

清

史

稿

清史稿

列傳一百六十九

瑚松額

布彥泰

薩迎阿

瑚松額巴岳忒氏滿洲正黃旗人西安駐防嘉慶初以前鋒從將軍恒瑞剿湖北教匪後隸那彥成德楞泰部下積功擢協領十八年滑縣教匪起瑚松額率馬隊從副都統富僧德戰道口及滑縣城下屢有功賜花翎二十三年擢福州副都統署福州將軍道光三年授察哈爾都統五年擢成都將軍乾隆中西甯王舒巴彥囊謙千戶分三百戶與其弟索諾木旺爾吉爲小囊謙由德爾格忒土司居間調處辦事大臣斷定旣而索諾木旺爾吉之子諾爾布不能服其屬戶大囊謙欲兼并之諾爾布訴於德爾格忒土司大囊謙復以上司有欺凌小囊謙情事互控不已下瑚松額按之奏請仍遵原斷大囊謙不得覬覦屬戶德爾格忒土司亦毋預鄰封事以杜爭端事乃定七年署四川總督九年調吉林將軍會宣宗東巡扈蹕校射中三矢賜黃馬褂十年母憂回旗尋署盛京將軍

十二年命偕尙書禧恩督師剿湖南搖匪趙金龍至則金龍已就戮其黨趙青  
仔率餘匪竄廣東湖北境督兵剿平之廣東連山排搖亦叛率提督余步雲等  
進剿禽匪首鄧三盤文理等搖衆投誠全境肅清賜雙眼花翎子一等輕車都  
尉世職命署福州將軍臺灣土匪張丙等作亂授爲欽差大臣偕參贊哈琅阿  
赴剿及抵福建提督馬濟勝已禽匪首臺灣略定十三年春命仍渡臺搜捕餘  
黨禽各路匪首二十餘人賊黨三百餘人分別賞之法械送張丙陳辦詹通陳  
連至京誅之加太子太保復調成都將軍十四年義邊馬邊夷匪勾結焚掠提  
督楊芳擊斃夷目以肅清入奏旣而夷復滋擾瑚松額以芳辦理未善劾罷之  
自請議處降一級留任十五年授陝西總督疏陳兵丁驕縱應加意訓練駕馭  
又密陳吏治情形優詔嘉納十七年京察詔嘉其不露鋒鋷細心任事予議敘  
西藏堪布入貢爲四川番匪劫掠瑚松額捕賊數十人得贓物奏請貢道改由  
柴達木由青海大臣遣兵護送又以野馬川地連野番請於大通河北岸立柵  
山厓築設墩卡派兵防守提標前後二營廠馬合并以厚兵力並允行二十一

年因病請開缺尋致仕許食全俸二十七年卒贈太子太傅賜卹諡果毅  
布彥泰顏扎氏滿洲正黃旗人父珠爾杭阿嘉慶初官鑲黃旗滿洲副都統以  
軍功予騎都尉世職布彥泰由廕生授藍翎侍衛襲世職洊升二等侍衛二十  
三年充伊犁領隊大臣道光初擢頭等侍衛歷喀什噶爾參贊大臣辦事大臣  
伊犁領隊大臣烏什辦事大臣九年授喀什噶爾總兵病歸十年予副都統銜  
乾清門行走充哈密辦事大臣調西甯辦事大臣將軍玉麟薦其習邊事調伊  
犁參贊大臣再調塔爾巴哈台參贊大臣十四年復以病歸十八年署正藍旗  
漢軍副都統擢察哈爾都統二十年授伊犁將軍入覲命在御前行走及赴任  
授鑲黃旗蒙古都統二十二年疏陳開墾事宜略言惠遠城三棵樹地方可墾  
地三萬餘畝請就本地民戶承種輸糧阿勒卜斯地方可墾十七萬餘畝請責  
成阿奇木伯克等籌計戶口酌量勻撥至二十四年疏報塔什圖畢等處開墾  
疊著成效詔嘉其忠誠爲國督率有方加太子太保又命會勘烏魯木齊未墾  
之地及各城曠地一律興辦尋疏言惠遠城東阿齊烏蘇廢地前任將軍松筠

奏撥八旗餘丁耕種因乏水不久廢棄今欲墾復必逐漸開渠極東且須引哈什河水方可用之不竭經營浩費較前次各案不啻數倍見委員勘估又以伊犁歷屆捐墾成案皆係收工而非收銀蓋辦工以工爲主計銀不如計工之直捷亦不如計工之覈實此次用夫匠五十三萬四千工實墾得地三棵樹紅柳灣三萬三千三百五十畝阿勒卜斯十六萬一千餘畝荒地之開墾成田由於渠工之開通水利故不能剷出某頃某畝爲某員所捐辦者仍請免其造冊報銷從之時前兩廣總督林則徐在戍所布彥泰於墾事一以諮之阿齊烏蘇卽由則徐捐辦事既上聞命布彥泰傳諭則徐赴南路阿克蘇烏什和闐周勘布彥泰疏留喀喇沙爾辦事大臣全慶暫緩更換與則徐會勘凡歷兩年得田六十餘萬畝事具全慶傳二十五年授陝甘總督青海番匪連年肆擾自二十三年總督富呢揚阿奏報進剿驅回河南實僅邀番僧資撫約不北犯次年復擾河北掠涼州營馬匹戕守備富呢揚阿諉稱匪乃四川果克黑番大雪封山難剿而西甯鎮總兵慶和出口會哨又遇賊被戕惠吉繼任總督檄提督胡超進

勦肅州兵不聽調譁噪胡超不能制惠吉籌辦未有緒歿於任乃以布彥泰代之未至命林則徐先署總督並授達洪阿西甯辦事大臣同治其事二十六年布彥泰抵任奏劾胡超畏葸罷之又論總兵站住攻勦不力褫職遣戍達洪阿率兵勦平番莊惟黑錯寺匪衆抗拒攻下之又破果岔賊巢拉布楞等寺僧收合四溝散番乞降事乃定布彥泰以調度有方被優敘親巡邊隘疏陳西甯地勢因河爲固扼險設備請於哈拉庫圖爾之南山根南川營之青石坡移建營堡黃河北岸頭岱東信忙多各渡口設卡又奏復防河舊章安置營汛並如議行二十七年安集延布魯特糾合回子圍喀什噶爾英吉沙爾詔布彥泰率兵赴肅州授爲定西將軍奕山爲參贊大臣將大舉出師會奕山率邊兵戰捷賊退二城解圍軍事告竣布彥泰回任二十九年因病請罷許之時爲固原知州徐采饒等所訐命協辦大學士祁寯藻往會總督琦善按之坐關防不密清查歧誤及失察家人議降調革任尋予二等待衛充葉爾羌幫辦大臣調伊犁參贊大臣借將軍奕山會議俄羅斯通商事宜語詳奕山傳咸豐二年授正白旗

漢軍副都統仍留邊任四年回京命赴王慶坨軍營以疾未行請開缺光緒六年卒年九十詔念前勞依都統例賜卹

薩迎阿字湘林鈕祜祿氏滿洲鎮黃旗人嘉慶十三年舉人兵部筆帖式擢禮部主事洊升郎中道光三年出爲湖南永州知府調長沙懋山東兗沂曹道甘肅蘭州道七年就遷按察使以治回疆軍需賜花翎六年擢河南布政使未任予副都統銜充哈密辦事大臣調喀喇沙爾辦事大臣十年安集延擾喀什噶爾邊卡薩迎阿赴土爾扈特霍碩特召兵赴援又襄治南路糧運授盛京工部侍郎兼管奉天府尹事十一年留京署鑲白旗漢軍副都統充烏什辦事大臣歷哈密辦事大臣葉爾羌幫辦大臣仍調哈密辦事大臣十五年授盛京禮部侍郎兼管府尹事調戶部二十年召授禮部侍郎兼鑲紅旗漢軍副都統調戶部兼管錢法堂二十三年擢熱河都統二十五年授伊犁將軍烏魯木齊興辦喀喇沙爾渠道隄壩下薩迎阿籌議疏言喀喇沙爾城西開都河道光十七年築護隄有屯田頭工二工兩渠自裁屯安戶後又於上游大河開一大渠嗣頭

二工又各添新渠共有五渠上年大水各渠口衝塌護隄亦壞今擬挑濬北大渠接長二千三百丈共長九千丈修築龍口石工外設木閘自龍口至坡心灘築碎石長壩四十餘丈中設洩水閘隨時啟閉接長舊隄三十餘里至北大渠口爲止其餘諸渠挑濬深通庶期經久又言吐魯番掘井取泉由地中連環導引澆灌高田以備渠水所不及名曰剛井舊有三十餘處見因伊拉里克戶民無力飭屬捐錢籌辦可得六十餘處共成百處尋以開墾挑渠辦有成效薩迎阿履勘籌議招種升科疏言墾地在渠水充盈用有餘裕升科不必求急期實有裨益行之久長新疆水利泉水少而雪水多雪水之遲早無定收穫之豐歉難齊請援鎮迪舊例減半升科下部議行英吉沙爾領隊大臣齊清額誤聽伯克言誣指回子胡完爲張格爾逆裔薩迎阿平反之詔嘉其詳慎二十七年安集延布魯特回衆入卡圍喀什噶爾英吉沙爾二城薩迎阿檄調諸城兵往勦葉爾羌參贊大臣奕山率諸軍由巴爾楚克進三戰皆捷薩迎阿別遣兵扼樹窩子二城圍尋解時方命陝甘總督布彥泰督師未出關而事平咸豐元年



召授正白旗滿洲都統會陝甘總督琦善勦青海番匪言官劾其妄殺命薩迎阿赴西甯按之奏調刑部司員梁照奎椿武汝清隨同鞫訊得番子十四名無辜誣服狀疏陳琦善勦辦黑城撒拉回子及黃喀窪番賊尙非無故興師惟將雍沙番族殺斃多名實係妄加誅戮並及文武妄拿刑求逼供詔褫琦善職逮京訊治命薩迎阿暫署陝甘總督甘肅營務廢弛雖議整頓而番匪時復出擾新授福建巡撫王懿德途經金縣士民呈控奏下薩迎阿察治屢被詰責二年解任回京自琦善之逮治也刑部尙書恒春以薩迎阿論劾過當欲令原訊司員對簿獨侍郎曾國藩持不可及廷臣會訊讞上琦善遣戍吉林司道以下文武論罪有差被誣番子免罪略如原讞薩迎阿坐未取應議各員供詞遽行擬罪又因子書紳與司員同坐問供下部議書紳降三級調用薩迎阿降四級留任歷署鑲藍旗正紅旗蒙古都統六年出署西安將軍逾歲卒詔念回疆軍務曾著勞績賜卹諡恪僖

論曰瑚松額川陝舊將屢任專征雖無赫赫功尙持大體晚膺疆寄稱厥職焉

布彥泰新疆開墾西甯平番皆賴林則徐之學畫薩迎阿平反番獄持正不阿而治番亦無良策蓋番族生計無資營伍廢弛已久議剿議撫補苴一時林則徐謂治番自古無一勞永逸之計亦慨乎其言之也

清史稿

列傳一百七十

張文浩

嚴煥

張井

吳邦慶

栗毓美

麟慶

潘錫恩

子 文

張文浩順天大興人入貲爲布政司經歷投效東河工竣發南河嘉慶十年授山清外河同知屢以河溢奪職尋復之補外河南岸同知十九年河督吳璥奏調赴隄工委用擢署淮海道二十四年河溢儀封復決武陟馬營壩調辦馬營壩工工竣賜花翎儀封決口猶未塞仁宗以吳璥年老命文浩署河東河道總督專駐工次疏陳築壩挑河估銀四百五十萬報可工竣晉二品頂戴兼兵部侍郎銜道光元年春欽天監奏彗星出東壁分野在衛地占主大水敕文浩防範侍郎吳烜請加高河隄文浩疏言河灘高下不齊長隄千餘里未能一律增高請加子堰二三尺從之實授河道總督三年丁母憂服未闋以畿輔連年水

忠召署工部侍郎借三品卿繼昌勘南北運河及永定河漫溢詔繼昌還文浩  
駐工會辦工竣與總督蔣攸銛合疏陳直隸河道漫水未涸無從查勘考詢各  
處隄埝無不堙塞殘廢每年二月方可動工五月即須停止工繁時促斷難同  
時興作請於來歲春融周歷履勘分別緩急估辦又言永定河爲患固山下口  
不能暢流亦由上游無所宣洩請修築重門閘添設減水壩又近年河流每多  
側注北岸宜添築越隄以爲重障四年春授江南河道總督其秋糧艘回空黃  
河高於清水停阻河北者數月詔切責降三品頂戴命設法蓄清以資浮送十  
一月始全數渡黃會洪澤湖漲水未消高堰十三堡隄潰萬一千餘丈山旰周  
橋悉浪蕪亦過水八九尺各壩漫溢宣宗怒褫文浩職命尙書文孚汪廷珍馳  
勘劾文浩禦黃壩應閉不閉五壩應開不開蓄清過旺以致潰決命於工次枷  
號一月遣戍新疆回疆軍事起隨營効力事平請釋回不許十六年卒於戍所  
嚴煊字小農浙江仁和人嘉慶中入貲爲通判發南河累擢徐州道丁母憂道  
光元年服闋授河南河北道尋命以三品頂戴署河東河道總督三汛安瀾乃

實授汶水漫決既塞疏言運河北路以蓄汶敵衝爲最要機宜必使汶水層層  
擡高然後能敵衝水請加高臨清口磚閘資收蓄從之初黎世序治南河多用  
碎石乃奏請敕東河仿行煇取其說請於馬營北岸挑壩仿南河拋護碎石佔  
工需銀十萬兩布政使程含章巡撫姚祖同先後言其不便而馬營既放淤壩  
前水勢已緩煇仍請於壩尾沁水灌注之所拋護碎石從之四年南河高家堰  
潰決調煇江南河道總督五年與尙書文孚汪廷珍合疏陳蓄清敵黃爲河務  
第一關鍵蓄清全賴湖隄潰則清水洩枯重運經臨無以資浮送擬遵古人  
成法借黃濟運所慮運河窄小黃流湍悍多則不能容納少則必致膠淺議於  
禦黃壩外建壩三道鉗束黃流俾有節制又添築絳道以資束水行絳裏揚兩  
廳長河挑挖淤淺幫培隄身並豫儲物料隨時築壩逼溜刷淤禦黃壩未啟則  
先挑高堰引河導清水入運將啟則嚴堵束清杜黃水入湖至修復湖隄必乘  
天寒水涸取土較易擬就近採料限大汛前砌高十層備湖水漸長共需帑銀  
三百萬又議覆侍郎朱士彥條上南河事宜大要拆修高家堰壩工先築越壩

以便工作並於石隄外拋碎石坦坡可期永無塌卸又於王家壩減壩內鹽河加築隄埝及仁義禮舊壩處所添建石滾壩以防異漲並如議行於是偕孫玉庭等會辦重運至五月禦黃壩啟放後河道仍淺滯漕船不能通行就近盤壩刺運難繼玉庭被重譴煇亦鐫級留任煇既因濟運事不敢擅離不能巡河勘工兩江總督琦善以爲言乃命煇周歷履勘仍諭蓄足清水爲來年敵黃濟運之計煇疏言從前黃河底深湖水收至數尺即可外注隄身不甚喫重今則湖水必蓄至二丈始可建頷而刷黃以四百里浩瀚之湖水恃一綫單隄爲之護西風衝擊勢必潰決擬仿成法於隄外築碎石坦坡護隄既固則湖水可蓄又偕琦善奏陳刷黃必須湖水收至二丈上年湖水丈七寸餘即致失事刻下清水萬難蓄足惟有蓄清減黃二法並行碎石護隄所以蓄清改移海口所以減黃詔妥籌具奏尋又會陳由王營減壩至灌河口可導黃入海查灌河口外海灘高仰轉無把握惟拋碎石坦坡可漸收蓄清刷黃之益需費六百餘萬應分年辦理六年洪湖石工既竣煇知工未堅固實不足恃遂堅主碎石之工每年

拋石三十萬方八年始能告成宣宗怒斥煥調任以來一籌莫展禦黃壩至今不能啟放辦理不善念在東河修守尙無貽誤降三品頂戴署河東河道總督七年實授復二品頂戴以蘭陽柴壩西北頂衝前拋碎石已著成效遇伏秋汛漲仍形喫重請加寬坦坡八年請續拋下北蘭儀兩廳碎石並於中河祥河險工儲石備防十一年命侍郎鍾昌等抽查東河料垛祥河曹考兩廳料垛虛鬆殘朽煥坐失察降三品頂戴鵠四級留任尋以病請開缺十三年病痊到京疏陳浙江海塘事宜十四年命偕侍郎趙盛奎往勘請分別緩急改修柴埽以護塘根歲撥銀五萬備修費從之尋命毋庸在工督辦復以病乞歸十五年河東河道總督吳邦慶劾煥虛拋碎石並收受紅封盤費以運同降補二十年卒張井字芥航陝西膚施人嘉慶六年進士以內閣中書用改知縣銓授廣東樂會引見特命改河南正陽調祥符遷許州直隸州知州襄辦馬營壩大工加知府銜署汝甯知府道光四年擢開歸陳許道尋以三品頂戴署河東河道總督五年秋汛安瀾乃實受增培黃河兩岸隄工並修泉河隄濬各湖斗門引渠疏

陳河工久遠大計略曰今日之黃河有防無治每遇伏秋大汛司河各官奔走搶救竭蹶情形惟日不足及至水落霜清則以目前可保無虞不復求疏刷河身之策漸致河底墊高清水不能暢出並誤漕運又增盤壩起剝及海運等費皆數十年來斤斤於築隄鑿埝以防爲治而未深求治之之要有以致之也當此河底未能疏濬之時惟仍守舊規以隄束水而水不能攻沙河身日形淤墊必得有刷深之方始可遂就下之性宣宗躋其言命偕兩江總督琦善南河總督嚴烺河南巡撫程祖洛籌議遂赴南河會勘六年疏言黃河病在中滿淤墊過甚自應因勢利導擬仿前大學士阿桂改河避險之法導使繞越高淤於安東東門之北別築新隄以北隄改作南隄中間抽挑引河傍舊河而行至絲綢濱以下仍歸海口無淤灘阻隔似可暢順東趨去路既暢上淤必掣深得黃與清平立啟禦黃壩挑通清水暢出刷黃自有建飯之勢詔嘉其有識調江南河道總督與總督琦善及副總河潘錫恩會議以改河避淤口門有碎石阻遏諸多窒碍請開放王營減壩以期減落黃水刷濬河身從之既而給事中楊煊奏



啟放減壩黃流湍急鹽河勢難容納恐滋流弊援嘉慶間減壩兩次漫口情形  
爲證復下詳議并言煊稽考成案於今昔情形似未周知昔年開壩漫口時在  
五月本年啟放定在霜後來源無慮續漲惟現據委員稟稱去路未見通暢是  
煊所奏不爲無見因思啟壩時水勢或可暢達堵合後全河仍必抬高恐徒深  
四邑之災無補全河之病請仍改河避淤上斥井持論游移不許是秋開放減  
壩如期堵合被褒敘七年春汛黃水倒漾仍高於清水禦壩驟啟放漕船倒  
塘灌運自請治罪降三品頂戴命大學蔣攸銛尙書穆彰阿往勘會黃水低落  
啟禦壩運船幸得全渡詔斥井急於求功泥於師古革職留任以觀後效八年  
疏陳要上四事黃河接築海口長隄並於下游多築埽壩以資刷凜洪澤湖添  
建滾壩加寬湖隄南連河移建昭關壩加幫兩岸緯隄北連河修復劉老澗石  
滾壩補還南岸緯隄命都統英和會同蔣攸銛查勘以添築埽壩不能疏通積  
淤海口築隄可從緩辦餘如議行九年以兩屆安瀾復二品頂戴諭相機規復  
河湖舊制疏言南河利害全係清江必清水暢出助黃刷淤則河與漕兩治惟

黃水積淤必清高於黃數尺又必啟壩時多閉壩時少乃能暢出濬刷現在清水能出僅免倒灌不誤漕行殊未易收刷濬之効十二年桃源縣民衆聚私掘官隄掣溜致成決口革職暫留任効力御史鮑文瀾宗人府府丞播錫恩並言黃水入湖恐妨運道命穆彰阿陶澍會勘籌議疏陳黃水入湖後卽由吳城七堡仍入黃河僅淤沿隄不及湖中未入束清壩不致病及運河正河乾涸正可將桃南桃北兩廳間大加挑濬除去中滿之患十三年于家灣合龍予四品頂戴尋引疾歸十五年卒於家并任兩河凡十年初治南河銳意任事洎興大工糜帑三百餘萬而無成效仍爲補苴之計用灌塘法較勝借黃之險勤於修守世稱其亞於黎世序云

吳邦慶字齊峯順天霸州人以拔貢官昌黎訓導嘉慶元年成進士選庶吉士授編修遷御史巡視東漕奏請重浚運河並復山東春兌春開舊制數論河漕事多被採用十九年擢鴻臚寺少卿命偕內閣學士穆彰阿督濬北運河累遷內閣侍讀學士二十年出爲山西布政使調河南護理巡撫二十三年擢湖南

巡撫調福建未之任湘潭土客民羣鬪死傷甚衆侍郎周系英面陳與邦慶疏奏有異命總督慶保往按邦慶亦發系英私書系英獲譴邦慶鑄級以三品京堂用補通政使二十五年擢兵部侍郎調刑部尋授安徽巡撫黃水注淮鳳穎被災而皖南苦旱親赴災區振撫涇縣民徐飛瀧傷斃邦慶誤聽承審官謂由於徐孝芳捏傷圖賴奏捕之激衆拒捕命兩江總督孫玉庭鞠治得其狀詔斥邦慶幾釀冤獄部議革職予編修累遷少詹事十年授貴州按察使未之任予三品卿銜署漕運總督尋實授禁糧船裝載蘆鹽請緝拿沿河窩頓十一年調江西巡撫十二年授河東河道總督以不諳河務辭不許初嚴烜在東河多用碎石拋護歷年歲料未有節省詔飭覈減邦慶疏請酌改舊章每年防料經費四成辦稽六成辦石蘭儀商虞下北三廳現工險要仍專案請辦碎石所議六成之石積儲數年使各廳皆存二千方緩急可恃則專案之石亦可逐年遞減從之武涉攔黃堰民築民修嗣歸廳管工段歲增十三年奏定畫界立石官民分守如有新生婦工先借帑辦理按河北三府攤徵歸款以山東運河全賴泉

源灌注請復設泉河通判以專責成壽東汛滾水壩外舊有土堰爲蓄汶敵衝以利漕運大水鄉民私開釀事奏立志楛濟運之水以七尺爲度重運過峻啟堰以利農田如議行初邦慶著畿輔水利叢書後在官考河南通省志乘所載有水田處臚列其水之衰旺溉田多寡之數爲渠田說修防之暇率道廳捐資造水車就馬營壩北及蔡家樓大窪積水地七千餘畝試行墾治先是邦慶因碎石工劾嚴烜能之既而給事中金應麟亦劾邦慶保舉過濫動撥過多十五年命大學士文孚山東巡撫鍾祥按之坐違例調地方人員改歸河工及以屬員爲幕僚廳員饋銀不奏參褫職詔復斥其參劾嚴烜遲至三年之久亦屬取巧念在任三屆安瀾加恩復予編修年已七十遂告歸二十八年卒

栗毓美字樸園山西渾源人嘉慶中以拔貢考授知縣發河南歷署溫孟安陽河內西華補甯陵所至著績父憂歸道光初服闋補武陟遷光州直隸州知州擢汝甯知府調開封歷糧鹽道開歸陳許道湖北按察使河南布政使護理巡撫十五年擢河東河道總督毓美自爲令時於黃沁隄工馬營壩工皆親其事

勤求河務時串溝久爲河患串溝者在隄河之間始僅斷港積水久而溝首受河又久而溝尾入河於是串溝遂成支河而遠隄十餘里之河變爲切近隄身往往潰隄毓美莅任乘小舟周歷南北兩岸時北岸原武汛串溝受水已三百丈行四十餘里至陽武溝尾復灌入大河又合沁河及武陟榮澤諸灘水畢注隄下兩汛素無工無稽石隄南北皆水不能取土築壩毓美乃收買民甌拋成甌壩數十所工甫就而風雨大至支河首尾皆決數十丈而隄不傷於是始知甌之可用疏陳辦理情形以圖說進尋又疏言王屋莊進水之口較前更寬百餘丈由中滋大灘益向南淤溜勢南緩而北緊南股正河成爲迂道北股之溜勢轉建甌其故由廣武山前老灘坍千餘丈溜趨山根爲山所遏折回東北中淤挺生淤灘水口既日見刷寬從省估計約需銀十餘萬兩至原陽兩岸隄根因沿陂試拋甌塊深資假護月石壩堵合加高幫寬迤下楊封封邱二汛灘水已停淤壩下七十餘村莊居民安堵惟串溝分溜關繫北岸全局不能緩至來年興工已借撥銀兩估辦允之是役支河危險賴甌工化險爲平尋偕巡撫桂

良勘奏老河分溜已有六分王屋莊口寬勢順輒土各壩未可深恃原武十六堡當其頂衝並有秦家廠鹽店莊各灘水串溝分注十七堡當支河尾閘皆險要請購料豫防如議行十六年擇要挑濬修築魚臺汛隄岸改民堰歸連河廳十八年旱漕艘阻滯濬泉源及各湖進水渠道嚴諸閘啟閉又濬曹州濟甯河渠十九年奏定微山湖收納運水章程但計水存丈三尺以內卽築壩蓄水加高戴柯壩以防旁洩初毓美以輒工屢著成效奏請許設窑燒造御史李蕤疏言其不使命尙書敬徵往勘仍請改辦碎石停止設窑毓美上疏爭之曰豫省歷次失事皆在無工處所隄長千里未能處處籌備一旦河勢變遷驟遇風雨輒倉皇失措幸而拍護平穩婦工費已不貲鑿婦引溜生工久爲河工所戒昧者轉謂非此別無良策查北岸爲運道所關往者原陽分溜幾掣動全河若非用輒拋護費何可數計今祥符下汛陳留一汛灘水串注隄根形勢正與北岸同濱河土民多有呈請用輒者誠有見於輒工得力爲保田廬情至切也夫事之有利於民者斷無不利於國特事近於創難免浮言前南河用石之始業議

紛如良山工程平穩用料減少販戶不能居奇工簡務閑游客幕友不能幫辦謀佳是以妄生浮議賴聖明獨斷敕下東河試辦至今永慶平成惟自用碎石請銀幾七十餘萬嗣改辦六成碎石然因購石不易埽段愈深愈多經費仍未能節省自試辦甄壩三年未生一新工較前三年節省銀三十六萬蓋豫省情形與江南不同產石祇濟源鞏縣采運維艱甄則沿河民窰不下數十座隨地隨時無悞事機且石性滑入水流轉甄性澀入土即黏卸成坦坡自能挑溜每方甄塊直六兩石價則五六兩至十餘兩不等碎石大小不一堆埽半屬空虛尺甄十塊爲一方平鋪計數堆埽均實每方石重五六千斤而甄重九千餘斤是一方石價購甄兩方而拋甄一方可當石兩方之用也或謂甄塊入土易損裂不知甄得水更堅拋成甄壩一經淤泥卽已凝結或謂拋築甄壩近於與水爭地不知隄前之地尺寸在所必爭自來鑿埽之法隄前必先築土壩數十丈然後用埽鑿設甄壩則無須乎埽師土壩之意不泥其法拋作坦坡大溜自然外移未有可築土壩而不可築甄壩者上年盛漲較二年及十二年尤猛迅甄

壩均屹立不移。惟中河兩廳河水下卸塌灘。壩拍鑿掃段旋卽走失。用甄拋護均能穩定。是用甄拍辦險工較鑿掃更爲便捷。昔衡工失事因灘陷不能鑿掃。馬工失事因補陡不能得碎石。使知用掃不如用甄。運甄易於運石。則費省而工已固。見在各廳無工之處。串溝隱患必應未雨綢繆。若於黃沁下南豫儲甄塊。則可有備無患。應儲之甄仍令民間採買。不必廳員燒造。此外別無流弊。卒如所議行。遂請以四成辦稽之款改辦甄塊。又疏言從前治河用捲掃法。並有竹絡木困甄石柳葦。自用料鑿掃以稽料爲正宗。而險無定所。亦無一勞永逸之計。緣鑿掃陡立易激。水怒其始水深。不過數尺。鑿掃數段引溜愈深。動輒數丈。無工變爲險工。溜勢上提必須添鑿溜勢下坐必須接鑿片段。愈長防守愈難。新工既生。益形勞費。掃工無法減少不得已而減土。工少購碎石皆爲苟且因循之計。自試拋甄壩或用以杜新工。或用以護舊工。無不著有成效。且甄工不特資經久而堆儲亦無風火堪虞。從此工固瀾安。益復培增土工。專用力於根本之地。既可免漫溢之患。亦保無衝決之虞。宣宗深嘉納之。巡撫牛



鑑入覲諭以毓美治河得手遇事毋掣其肘二十年京察特予議敘尋卒優詔褒惜贈太子太保依總督例賜卹賜其子燿進士諡恭勤祀名宦祠毓美治河風雨危險必躬親河道曲折高下嚮背皆所隱度每日水將抵某所急備之或以爲迂且勞費毓美曰能知費之爲省乃眞能費者也水至乃大服在任五年河不爲患歿後吏民思慕廟祀以爲神數著靈應加封號列入祀典

麟慶字見亭完顏氏滿洲鑲黃旗人嘉慶十四年進士授內閣中書遷兵部主事改中允道光三年出爲安徽徽州知府調潁州擢河南開歸陳許道歷河南按察使貴州布政使護理巡撫十三年擢湖北巡撫尋授江南河道總督丁母憂改署理服闋乃寔授疏陳籌辦南河情形略曰近年河湖交敞欲復舊制不外蓄清刷黃古人引導清水三分濟運七分刷黃得力在磨盤埽自廢棄後河務漸壞擬規復磨盤埽舊制洪澤湖水甚寬高家堰工絕險各埽多封柴土蓄水盛漲敞放輒壞埽底糜費不貲應仿滾水埽成法抬高石底至蓄水尺寸爲度山埽五埽暨下游楊河境內車灘等埽一遵奏定丈尺敞放水定卽行堵合

至黃河各工當體察平險節可緩之埽段辦緊要之土工一切疏浚器具祇備  
運河挑挖若黃河底淤非人力所能強刷惟儲備料上遇險即搶以防爲治而  
其要全在得人又以蘆葦爲工程必需右營蕩地荒廢產蘆不足請築圩蓄水  
以資灌溉疏入詔嘉其言正當勸慎勉從事十四年以洪澤湖老子山西北挑  
砌石壩東西沙路加築碎石高出湖面以便水師巡哨及商民停泊疏請淮海  
常鎮等道另案用銀詔以南河連歲安瀾而工用日增切責之十九年修惠濟  
正閘福興越閘會河湖並漲險工疊生請例外撥銀五十萬詔允之戒嗣後不  
得援例畧兩江總督二十一年河決祥符黃水匯注洪澤湖南河無事詔嘉其  
化險爲夷予議敘二十二年英吉利兵艦入江命籌淮揚防務以保運道請以  
鹽運使但明倫備防揚州以清江爲後路策應捕內匪陳三虎等誅之秋河決  
桃北崔鎮汛值漕船回空改由中河灌塘通行無誤詔念防務及濟運勞革職  
免罪二十三年發東河中牟工效力工竣以四品京堂候補尋予二等侍衛充  
庫倫辦事大臣乞病未行病痊仍改四品京堂尋卒著有黃運河口古今圖說

河工器具圖說子崇實崇厚並自有傳

潘錫恩字芸閣安徽涇縣人嘉慶十六年進士選庶吉士授編修大考第一超擢侍讀道光四年復大考一等擢侍讀學士時河患急錫恩上疏條陳河務略曰蓄清敵黃爲相傳成法大汛將至急堵禦黃壩使黃水全力東趨今年漕艘早渡因禦黃壩遲堵以致倒灌停淤釀成大患且欲籌減洩當在下游乃輒開祥符牖減黃入湖壩口已灌於下牖口復灌於上黃水俱無出路湖底淤墊極高若更引黃入運河道淤滿處處壅溢恐有決口之患宣宗雖其議五年命以道員發往南河補淮揚道六年加三品頂戴授南河副總河九年母憂去官服闋授光祿寺卿恩宗人府府丞左副都御史督順天學政擢兵部侍郎調吏部仍留學政十九年內監狄文學以甥考試被黜至錫恩私宅言所取錄多出請託挾制訛詐錫恩疏聞特詔論文學大辟二十二年疏言黃河自桃北崔鎮汛蕭家莊北決口穿運河壞遙隄歸入六塘河東注正河自揚工以下斷流去清日約有六七十里之遠回空漕船阻於宿遷以上臣前任淮揚道時詳辦屛水

通船之法行之十餘年幸無貽誤今若於中河西口外築箝口壩添設草牐以爲黃水啓閉之用卽將楊家壩作攔清堰以爲清水啓閉之用就中河運道爲一大塘道里長則容船衆兩次啟閉漕船可以全渡惟黃水先已灌入運河中泓淤墊兩岸緣隄亦恐有衝缺趕緊修濬計需費亦不甚多此時果可回空來年卽可出重則蕭莊決口不妨從緩堵築儻此法趕辦不及祇有竟用引黃濟運之法其臨黃箝口壩草牐照式築作引黃水入壩送船沿途多築對頭小壩以備溜刷深庶免淤滯之患迨出楊莊匯入清河之水卽可牽挽南行蓋南岸不可借黃者恐其淤湖淤運今所引黃水一出楊莊口仍歸舊河自可用清口之水以刷滌之應無流弊並以圖說進下河督麟慶議行麟慶亦主用灌塘法與錫恩言合尋代麟慶爲江南河道總督時揚工漫溢尙書敬徵等查勘堵築決口開挖引河接挑長河淤墊估銀五百七十萬兩有奇御史雷以誠奏決口無庸堵合祇須改舊河爲支河以通運道而節糜費下錫恩會議錫恩奏覆灌口非可行河之地北岸無可改河之理請仍堵築決口漕船回空仍由中河灌

塘命侍郎成剛府尹李德赴工會同錫恩督辦二十三年夫工以下挑河四萬一百九十餘丈工竣啓除界壩放水通暢會河南中牟河決黃水注湖請放山盱各壩宣洩湖水並將夫工導出湖水引入中河暫濟鹽柴轉運復以上游河水陡落間有淤墊請改估蕭工以下未挑之工並挑築大隄單薄卑矮處是秋湖水接長掣卸高堰石工四千餘丈搶護未決二十四年黃流未復故道急籌濟運並宣洩湖水請啟放外南廳屬順清河導引入河歸海軍船抵壩卽由其處放渡並於外南之北攔黃壩址築鉗口土壩以資停蓄尋奏黃河上游六月間陡長水丈餘山盱林家西壩舊義河直壩及仁義河中間攔堰間有掣壩補修完密裏河揚三廳承受洪湖之水兩岸絳隄舊有護埽者致多刷墊亦擇要加鑲二十五年中牟工始合龍南河連年無險二十八年以病乞歸咸豐中命在籍治捐輸兩練八年前江西巡撫張芾劾其勸捐無狀褫職同治三年捐京倉米折復原銜命赴安徽廬州會辦勸捐守禦事五年鄉舉重逢加太子少保六年卒漕運總督張之萬疏陳錫恩治績賜祭葬諡文慎入祀鄉賢祠子駿文

入賞爲刑部郎中改山東知府咸豐末擒匪犯省城駿文率兵圍擊於段家店却之署青州平淄川鳳皇山土匪擢道員同治中巡撫閻敬銘丁寶楨皆倚之從寶楨會勦擒匪塞河侯家林功尤多授兗沂曹道光緒中遷按察使坐事降調以謫省河事仍留山東歷治上下游要工調河南鄭工專任西壩以合龍愆期革職留工工竣復原官授山西按察使護理巡撫遷福建布政使十九年卒於官山東士民以其治河功請建專祠

論曰河患至道光朝而愈亟南河爲漕運所累愈治愈壞自張文浩蓄清肇禍高堰決而運道阻嚴燧畏首畏尾湖河並不能治張井創議改河而不敢執咎迄於無成灌塘濟運賴以彌縫麟慶潘錫恩循其成法幸無大敗而已吳邦慶講求水利而治河未有顯績粟毓美實心實力卓爲當時河臣之冠不獨碑工創法爲可紀也東河自毓美後朱襲鍾祥文冲繼之祥符守牟迭決東河遂益棘矣

清史稿

列傳一百七十一

林培厚

字 景 題

李宗傳

王鳳生

頁 七

俞德淵

姚瑩

林培厚字敏齋浙江瑞安人嘉慶十三年進士選庶吉士授編修出爲四川重慶知府囑匪帶刀異常製禁鍛者毋製賣有犯則坐沿江渡船爲盜資籍而稽其出入刻姓名船側盜爲衰息民習天主教搜其書批抉繆妄聞者多悔悟署川東道所屬雷波廳民夷忿爭或覬覦邀功請發兵培厚不應立縛治其魁餘悉貸遣總督蔣攸銛器之稱爲蜀中良吏之最母憂歸服闋授直隸天津府畿輔大水天津地窪下災尤劇培厚徧行屬縣賑活饑民七萬有奇奉天臺灣商米先後抵海口議以官錢收買委曲劑量商民交利而官不費時蔣攸銛移督直隸詔舉賢吏遂薦之不旬日擢大順廣道畿南澇後大興水利培厚先在天津治淀河至大名治新衛河洛河浚築悉中程度培厚數以時事利病屬吏賢



否語攸銛爲布政使屠之申所忌及攸銛入相邢彥成代之坐河北旱荒施賑不如法解培厚任宣宗夙知其能改授湖北糧儲道時河患淺澗漕舟數阻攸銛以大學士出督兩江期八省漕以首夏畢渡河乘清水盛漲浮渡適利培厚所部尤速達爲嘉慶以來數十年所未有攸銛特疏陳給敘歷三連無誤上意方嚮用以勞卒於通州運次李象鵬字雲皋湖南長沙人嘉慶十六年進士選庶吉士授編修道光二年出爲直隸宣化知府歲饑禁姦販安屯戶煮粥以賑民無失所課士有法一變邊郡尠陋之習調正定再調保定蔣攸銛邢彥成先後爲總督皆倚如左右手象鵬持正無撓擢通水道調河南鹽糧道治漕嚴弁丁懷懷禁胥役藉雇剝船擾民請潞鹽仍歸商運民便之丁父艱歸服闋補江西吉南贛甯道轄境與粵東犬牙相錯多伏莽屬縣僻瘠幾不可治象鵬掃除積弊境內秩然擢江蘇按察使署江甯布政使時陶澍爲總督賴其佐理焉調貴州按察使仁懷奸民爲亂株連衆治之無枉縱擢布政使禁漢奸盤剝苗民多惠政二十四年以假去職洎入覲詔以三品京堂候補未幾乞歸



李宗傳字孝曾安徽桐城人嘉慶三年舉人授浙江上虞知縣先攝麗水平湖瑞安建德平陽所至求民隱鋤豪強平反冤獄在麗水斷積案七百餘事捐資河工敘知府擢浙江督糧道道光三年杭嘉湖三府大水宗傳建議浙西諸水尾閘下由江蘇入海必宜江浙兩省通籌疏濬大吏用其言疏請合治坐事左遷巡撫程含章薦之以知府用授湖南永州葺濂溪書院崇節義勸種植擢四川成綿龍茂道累攝鹽道布政使十三年義邊屬裸夷降復叛勢甚張總督鄂山既奏劾提督楊芳檄宗傳往察治宗傳上言四廳夷環山爲巢嗜利頑鈍愈撫愈囂去年添兵設防夷轉四出焚掠攻壘窺城略無忌憚雖擾一廳實四廳安危所繫不可姑息貽患乃建三路進剿之策倡助軍需治兵選士聲威大振三路大軍猶未至宗傳先以計誘降十三支夷繫之勒還所掠人口有業者復之無業者給資縱俘歸使諭威德夷猶豫未決大軍由冷蹟關逼老林巢數大破之於石門坎擒斬數百毀賊寨二百餘所夷落悉平論功最擢山東按察使捕大盜劉二鞍子寅之法羣盜遠遁湖北布政使年逾七十引疾歸宗傳征

叛夷出奇有功然居恒時以計取傷仁意不自慊嘗從同縣姚鼎遊能文章

王鳳生字竹嶼安徽婺源人父友亮乾隆四十六年進士由中書充軍機章京累遷刑部郎中精究法律治獄矜慎改御史巡城巡漕官至通政司副使有清直聲以詩名鳳生嘉慶中入貲爲浙江通判屢攝知縣事任蘭溪僅數月清積案七百餘事任平湖有民數百戶誦經茹素傳授邪教鳳生憫其愚惑開諭利害治爲首數人罪餘釋之補嘉興府通判道光初浙江清查倉庫以鳳生總其事署嘉興知府遷玉環廳同知會浙西大水江浙兩省議合治調鳳生乍浦同知勘水道乃由天目山歷湖州嘉興沿太湖以達松江計畫甫就事未行值淮南高堰潰決江南大吏疏調鳳生赴南河未幾擢河南歸德知府濬虞城下邑永城二縣溝渠尋擢彰衛懷道道屬河工五廳歲修糜費春秋防汛虛應故事鳳生力矯積習事必躬親以歲修有定例另案無定例在任三年力刪另案以杜弊尋以疾乞歸九年兩江總督蔣攸銛薦起原官署兩淮鹽運使鳳生以淮鹽極敝條上十八事攸銛採其議改竄鹽節浮費濬河道增屯船緝場私隣私

之出入禁江船漕船之夾帶及清查庫款督運淮北諸條疏陳待施行會詔捕鹽梟巨魁黃玉林鳳生計招出首責緝私贖罪攸銛已入告旋因告訐置之獄又得玉林所寄其黨私書意反復密疏請處以重法上以前後岐異譴攸銛鳳生亦降調陶澍繼督兩江與尙書王鼎寶興會籌鹽法合疏留鳳生襄議於是大有興革略與鳳生初議相出入又奏以鳳生察湖廣銷引勘議淮北改票事鳳生雖去官仍與鹽事終始十二年湖北大潦總督盧坤疏留鳳生治江漢隄工袤亙數百里半載告竣秋水至新隄有潰者鳳生引咎乞疾歸尋淮北崇鹽大暢陶澍以鳳生首議功上聞從之出未行而卒鳳生以仕爲學尤篤好圖志成浙西水利圖說備考河北采風錄江淮河運圖漢江紀程江漢宣防備考淮南北場河運鹽走私道路圖每吏一方必能指畫其形勢與所宜興革四方大吏爭相疏調少竟其用惟治淮鹽尤爲陶澍所倚藉焉黃冕字服周湖南長沙人年二十官兩淮鹽大使治淮揚賑有聲初行海運巡撫陶澍使赴上海集沙船與議盡得要領授江都知縣歷元和上海署太倉州擢蘇州府同知晉秩知

府署常州鎮江有大興作大吏悉倚以辦疏治劉河海口上海蒲匯塘常州芙蓉江孟河宛皆躬任之海疆兵事起從總督裕謙赴浙江裕謙死難宛牽連遣戍伊犁既而林則徐亦至戍議興屯田宛佐治水利有功赦還江蘇巡撫陸建瀛復調宛治海運革漕費歲省銀數十萬爲忌者所中劾罷歸咸豐初粵匪圍長沙宛建守禦策及曾國藩治兵討賊宛創釐稅興茶鹽之利軍餉取給焉又開東征局專餉曾國藩一軍起授江西吉安知府復以事劾免歸仍以餉事自任湘軍賴以成功尋授雲南迤西道辭病不赴卒於家宛仕宦初爲陶澍林則徐所知晚在籍爲駱秉章所倚任時稱其幹濟被謗亦甚云

俞德淵字陶泉甘肅平羅人嘉慶二十二年進士選庶吉士散館授江蘇荆溪知縣始至遮訴者百十輩逾年前訴者又易名來控一見卽識之羣驚爲神調長洲甚得民心遷蘇州督糧同知道光六年初行海運以德淵董其役章程皆出手定以變去八年服闋擢常州知府調江甯十年宣宗以兩淮鹽法大壞授陶澍爲兩江總督命尙書王鼎侍郎寶興赴江南會議改革時議者多主罷官

商鹽歸場竈科稅以德淵有心計使與議德淵具議數千言略謂鹽歸場竈其法有三一曰歸竈丁按繳起科然其中有難行者三一在竈丁之通欠一在繳錢之私煎一在災祲之藉口二曰歸場官給單收稅難行者亦有三一在額數之難定一在稽查之難周一在官吏之難恃三曰歸場商認繳納課難行者亦有三一在疲商之鑽充一在殷戶之規避一在垣外之私售以上三法共有九難如就三者兼權之則招商認繳猶爲此善於彼苟得其人或可講求盡善顧事關綱始果欲行之則宜先定章程清竈僉商改官易制諸事非三年不能就緒此三年中額課未可長懸也場鹽未可停售也各岸食鹽未可久缺也新舊接替之時非熟思審處何能變通盡利乎向來摺鹽之夫淮北永豐有萬餘人淮南老虎頭不下數萬人皆無賴遊民以此爲事業一旦失所此數萬衆將安往其患又不止私梟拒捕已也議上陶澍深然之乃與朝使定議不歸場竈仍用官商如故惟奏能鹽政裁浮費減窩價凡積弊皆除之薦德淵超擢兩淮鹽運使德淵精會計又知人善任諸滯岸商憚往運改以官督辦千里行鹽稽覈

價用瑣屑悉當每運恆有餘利盡以充庫無私取兩淮本脂膏地運使多以財結權貴及四方遊客餘贍給寒賤取聲譽皆出商資德淵謹守筭鑰失望者衆言者時相攻訐不顧也在任五年力崇節儉妻子常衣布素揚州華侈之俗爲之一變尙書黃鉞子中民爲場大使欲得美職德淵曰美職以待有功中民無功不可得堅不與陶澍益賢之薦其才可大用以循良久在鹽官可惜上亦嘉之未及擢用而卒

姚瑩字石甫安徽桐城人嘉慶十三年進士授福建平和知縣調龍溪俗健悍械鬪仇殺無虛日瑩禽巨惡立斃之收豪猾爲用予以自新親巡問疾苦使侵奪者各還舊業誓解仇讐擇強力者爲家長約束族衆籍壯丁爲鄉勇逐捕盜賊有犯責家長縛送械鬪平盜賊亦輯治行爲閩中第一調臺灣署海防同知噶瑪蘭同知坐事落職尋以噶瑪蘭獲盜功復官父憂歸服闋改發江蘇歷金壇元和武進遷高郵知州擢兩淮監掣同知護鹽運使先後驅吏趙慎畛陶澍林則徐皆薦其可大用道光十年特擢臺灣道及海疆戒嚴瑩與總兵達洪阿

預爲戰守計達洪阿性剛與同官鮮合瑩推誠相接一日謁謝曰武人不學爲子所容久矣自今聽子而行二十一年秋英兵兩犯雞籠海口明年正月又犯大安港瑩設方略與達洪阿督兵連卻之大有斬獲收前所失甯波廈門礮械甚多敵構奸民煽亂海寇亦竊發皆即捕戮一方屹然詔嘉獎加二品銜予雲騎尉世職洎江甯議款求息事遂有臺灣鎮道冒功之獄故事臺灣以懸隔海外加兵備道按察使銜得與鎮臣專奏事鶴籠大安之捷飛章入告總督怡良心不平英兵留駐鼓浪嶼前獲俘欲解內地勢不能達奏請便宜誅之以絕內患已報可怡良仍令解省瑩與達洪阿謀曰大府意欲市德藉以退鼓浪嶼之兵兵不可退徒示弱不如殺之怡良愈怒諸帥並忌之歛議既成交還敵俘以妄殺被劾逮問瑩與達洪阿約義不與俘虜質即自引咎宣宗心知臺灣功入獄六日特旨以同知直隸州知州發往四川効用至則復爲總督寶興所忌會西藏兩呼圖克圖相爭檄往平之瑩謂夷人難以德化失職下僚子身往徒損國威不聽及至乍雅果不得要領而返總督劾其畏難規避責再往事竣補蓬

州在州二年引疾歸文宗即位黜大學士穆彰阿詔宣示中外並及瑩與達洪阿被陷狀於是復起用授湖北武昌鹽法道未行擢廣西按察使命參大學士賽尙阿軍事時廣西寇漸熾諸將不合師久無功瑩至任爲翼長大軍圍賊紫金山瑩言流賊如水必環攻以斷其逸不聽賊遂竄永安又上書請斬債事將復不聽永安城小都統烏蘭泰軍西南提督向榮軍東北合滇黔楚蜀兵四萬餘人賊數千壁險死鬪水竄者永安東北之隘也緣山徑可達桂林瑩與烏蘭泰皆主擊水竄絕賊外援向榮不從自由龍窠嶺進而敗乃議開水竄一路縱賊逸尾追擊之瑩力辯其失賽尙阿仍用向榮策賊果突圍出犯桂林烏蘭泰戰死賽尙阿遽問賊勢益熾連陷興安全州犯湖南遂不可制瑩隨軍至湖南巡撫張亮基奏署按察使憂憤致疾卒於官瑩師事從祖鼎不好經生章句務通大意見諸施行文章善持論指陳時事利害慷慨深切所著東溟文集奏稿後湘詩集東槎紀略康輜紀行及雜著諸書爲中復堂全集行於世子溶昌能繼家學曾國藩以名家子留佐幕官江西安徽湖北竹山知縣工詩有五瑞堂



集

論曰林培厚教荒治河有實績而以察吏招忌李宗傳便宜平夷功在邊方王鳳生俞德淵佐陶澍治淮鹽尤濟時之才姚瑩保嚴疆挫強敵反遭譏謫然朝廷未嘗不諒其忠勤海內引領望其再用亦不可謂不遇矣

杜受田

祁寯藻

子世英

翁心存

彭蘊章

杜受田字芝農山東濱州人父塲嘉慶六年進士由翰林院編修累官禮部侍郎重宴鹿鳴加太子少保卒贈太傅諡文端受田道光三年進士會試第一殿試二甲第一選庶吉士授編修大考擢中允遷洗馬督山西學政十五年特召還京直上書房授文宗讀四遷內閣學士命專心授讀毋庸到閣批本十八年擢工部侍郎調戶部二十四年連擢左都御史工部尚書尋充上書房總師傅文宗自六歲入學受田朝夕納誨必以正道歷十餘年至宣宗晚年以文宗長且賢欲付大業猶未決會校獵南苑諸皇子皆從恭親王奕訢獲禽最多文宗未發一矢問之對曰時方春鳥獸孽育不忍傷生以干天和宣宗大悅曰此真帝者之言立儲遂密定受田輔導之力也三十年文宗即位加太子太傅兼署吏部尚書調刑部尚書協辦大學士受田雖未入樞廷國家大政及進退大臣

上必諮而後行廣西軍事亟受田數陳方略薦林則徐周天爵先後起用提督向榮老於軍事以同列不和被謗力陳輿論數保全之咸豐元年調管禮部二年因河決豐北久未塞山東江北被災重命偕福州將軍怡良往治賑務疏言災廣民衆賑恤不可緩尤在得人薦山東布政使劉源灝江南布政使祁宿藻皆持正有爲責成專任請截留江廣漕米六十萬石分給兩省詔並允行受田自侍文宗學未嘗離左右當陛辭不覺感戀流涕在途觸暑染疫力疾治事與源灝宿藻等覈定施賑章程疏陳不言病至清江浦遽卒遺疏念賊氛未靖河患未平尤以敬天法祖勤政愛民崇節儉慎好惡平賞罰爲言文宗震悼贈太師大學士入祀賢良祠賜金五千兩治喪遣近臣慰視其父塲擢其子檢討翰爲庶子孫三人並賜舉人復特詔曰杜受田品端學粹正色立朝皇考深加倚重特簡爲朕師傅憶在書齋凡所陳說悉本唐虞三代聖聖相傳之旨實能發明蘊奧體用兼賅朕即位後周諮時政利弊民生疾苦盡心獻替啟沃良多援嘉慶朝大學士朱珪故事特諡文正謂其公忠正直足當正字而無愧極至

京上親奠撫棺哭甚哀嘗其父塲禮部尚書銜明年上臨雍講學復詔褒受田  
錢日講貫之功卽家賜祭一壇及柩歸命恭親王奠送遣官到籍致祭飾終之  
典一時無與比子翻山翰林院編修累官戶部侍郎督辦山東團練翰字繼崗  
道光二十四年進士選庶吉士授檢討咸豐三年降服闋補庶子文宗念受田  
舊勞數月間迭擢工部侍郎命在軍機大臣上行走辦理京城巡防事宜翰勇  
於任事甚被倚任十年隨扈熱河以勞賜花翎上崩於行在穆宗卽位御史董  
元醇疏請兩宮皇太后垂簾聽政載垣端華肅順等持不可翰附之抗言甚力  
遂黜元醇議肅順曰君誠不愧杜文正之子也既而載垣等以竊奪政柄被罪  
翰連坐議革職咸豐詔原之褫職免其發遣同治五年卒

郝蕙藻字春圃山西壽陽人父誦士官戶部郎中以事繫獄蕙藻方幼隨侍讀  
書不輟賦春草詩以見志嘉慶十九年成進士選庶吉士授編修道光元年直  
南書房督湖南學政累遷庶子十年以母病陳情歸養宣宗不許子假省親逾  
年回京補原官遷侍講學士尋復子假省母不開缺歷通政司副使光祿寺卿

內閣學士母憂歸十六年將屆服闋預授兵部侍郎督江蘇學政歷戶部吏部  
侍郎留學政任未滿十九年命偕侍郎黃樹滋視福建海防及禁烟事連擢左  
都御史兵部尙書迭疏陳總督宜駐泉州治防務改海口礮臺爲墩查禁烟販  
捕治漢奸並禁漳泉兩府行使夷錢夾帶私鑄者治罪嚴懲械鬪並得旨允行  
在閩半載還經浙江按台溫兩府私種罌粟劾罷台州知府潘盛又劾溫州知  
府劉煜試行票鹽不善被議自呈枉屈戍新疆時鄧廷楨奏擊英吉利兵船於  
廈門走之忌者謂其不實命竊藻復往按具陳戰勝狀回京仍直南書房二十  
一年調戶部命爲軍機大臣二十六年偕尙書文慶按長蘆鹽運使陳鑑挪撥  
鹽課彌補加價褫其職歷任鹽政運司議譴有差二十九年以戶部尙書協辦  
大學士命赴甘肅偕琦善按前任總督布彥泰清查舛誤縱容家丁下嚴議回  
京請使道省墓途次聞宣宗崩過里門不入文宗卽位拜體仁閣大學士仍管  
戶部竊藻自道光中論洋務與穆彰阿不合至是文宗銳意圖治罷穆彰阿竊  
藻遂領樞務開言路起用舊臣竊藻實左右之咸豐元年調管工部兼管戶部

三庫事務二年復調戶部廣西匪日熾出湖南遂不可制湖北江南數省先後淪陷軍興財匱議者試行鈔法又鑄當百當五百大錢皆行之未久而滋弊尙書肅順同掌戶部事尙苛刻又湘軍初起肅順力言其可用上嚮之宿藻皆意與齟齬屢稱病請罷溫詔慰留四年冬復堅以爲請乃允致仕十年英法聯軍犯天津車駕將幸熱河竊藻密疏切諫又言關中形勝可建都釐捐病民北省尤宜急停並報聞十一年穆宗卽位特詔起用疏陳時政六事曰保護聖躬以崇帝學曰緩輯民心以清盜源曰重守令以固民心曰開制科以收人才曰速剿山東河南賊匪嚴防山西陝西要隘以衛畿輔曰敦崇節儉以培元氣言甚切摯並被嘉納次第施行命以大學士銜授禮部尙書同治元年穆宗入學命直弘德殿借翁心存倭仁李鴻藻同授讀誦錄經史二帙進呈上讀大學畢寫藻具疏推陳爲人君止於仁之義略曰大學一書皇上已成誦凡制治保邦之道用人行政之源皆在於是爲人君之道止於仁而已治國平天下兩章言仁者六終之以未有好仁而下不好義蓋仁者必以仁親爲寶故能愛人能惡

人不好仁則好人之所惡惡人之所好仁者必以貪爲戒故忠信以得之不仁者則驕泰以失之矣仁者以義爲利不以利爲利故以財發身不仁者則以身發財菑害並至矣千古治亂之機判於義利而義利之判則由於上之好仁不好仁也如近日所講帝鑑圖說下車泣罪解網施恩澤及枯骨等事斯即帝王仁心所見端也若納諫求賢尊儒遠佞則仁親爲實能好能惡之說也露臺罷工裘馬卻獻則以義爲利不以利爲利之說也帝鑑圖說講畢請進講輿地以會典諸圖簡明易於指畫又耕織圖及內府石刻宋馬遠豳風圖爲農桑衣食之原皇上讀書之暇隨時講求庶知稼穡之艱難懷守成之不易也二年前上服除駕藻借倭仁李鴻藻上疏曰皇上冲齡踐祚智慧漸開當此釋服之初吉禮舉行聖心之敬肆於此分風會之轉移即於此始則玩好之漸可慮也游觀之漸可慮也興作之漸可慮也嗜好之端一開不惟分誦讀之心海內之窺意旨者且將從風而靡安危治亂之機其端甚微所關甚鉅可無慎乎方今軍務未平生民塗炭正君臣交儆之時非上下恬熙之日伏願皇上恪遵慈訓時時以

憂勤惕厲爲心以逸樂便安爲戒凡內廷服御一切用項稍涉浮靡概從裁減  
向例所有不妨量爲樽節如是則外務之紛華不接於耳目詩書之啓迪益歛  
夫心思聖學日新聖德日固而去奢崇儉之風自不令而行矣疏上優詔褒答  
焉竊藻提倡樸學延納寒素士林歸之疏言通經之學義理與訓詁不可偏重  
後學不察以訓詁專屬漢儒義理專屬宋儒使畫分界限學術日歧因舉素所  
知寒士端木埰鄭珍莫友芝閻汝弼王軒楊寶臣經明行修堪資器使又疏言  
軍興以來不講吏治請下中外大臣保舉循吏及伏處潛修之士以備任用自  
舉原任同知劉大紳按察使李文耕大順廣道劉煦請宣付史館入循吏傳又  
薦直隸知縣張光藻陳崇砥王蘭廣山東知縣蔣慶第山西知縣程豫吳輝祖  
及江南優貢端木埰山西舉人秦東來並嘉納允行屢以病乞休三年詔許致  
仕食全俸五年卒曾贈太保祀賢良祠命鍾郡王奠醑謚文端擢其子編修世  
長以侍讀用世長字子禾咸豐十年進士年十三侍父江蘇學政任幕客僉正  
變張穆苗夔諸人並樸學通儒世長濡染有素尤篤守宋儒義理之說同治九



年服闋補侍讀累遷內閣學士光緒初連督安徽順天浙江學政清勤愛士一守舊藻舊規歷禮部吏部侍郎擢左都御史十年命借尙書延煦勘山東河工疏言非疏海口不能洩盛漲修防以民埵爲第一層屏障守民埵卽以守大隄巡撫陳士杰築修民埵多在大隄既決之後殊爲失計請乘時興修從之迭疏陳時務多持正議十六年遷工部尙書兼管順天府尹兩典會試皆得士世長清操自勵累世官卿貳家如寒素時以稱焉十八年卒優詔賜卹諡文恪賜其孫師曾員外郎子友業主事

翁心存字二銘江蘇常熟人父咸封官海州學正知州唐仲冕見心存有異才奇之授之學道光二年成進士選庶吉士授編修大考擢中允督江西學政任滿入直上書房授惠郡王讀尋督江西學政累遷大理寺少卿十七年復直上書房授六阿哥讀逾年以母老乞養家居十年終母喪會子同書督貴州學政陞辭宣宗命傳諭促之來二十九年至京仍入直授八阿哥讀補祭酒歷內閣學士工部侍郎調戶部江蘇巡撫請蘇州松江太倉漕米改徵折色心存謂三

屬額徵米一百十四萬餘石一旦改折慮京倉不敷支放州縣假折色抑勒倍徵便民適以累民主駁議事乃寢咸豐元年擢工部尚書三年江甯陷心存疏陳兵事請乘賊勢未定飭向榮渡江陳金綬進屯浦口以上海水師溯流衝其前江忠源鄧紹良之師掩其後四路進攻增重兵守江淮杜北竄急清兗豫鳳穎捻匪毋令與粵寇合勢並嚴軍需恤災黎籌京倉積貯整飭紀綱以維根本疏上多被採用又薦湖北按察使江忠源請畀統帥重任尋卽擢爲巡撫調刑部再調工部兼管順天府尹粵匪北犯心存疏言賊氛逼近請扼河而守畿南宜駐重兵河南山西陝西各要隘併力堵截速調駐熱河綏遠之蒙古馬隊進口內衛京畿京師九門嚴緝奸宄運通倉存糧入城並敕琦善鄧紹良規復揚州鎮江爲會勦江甯之計又疏陳順天府務畫分汛地舉行團練府屬各營舊隸總督管轄請旨暫歸調遣未幾賊犯天津僧格林沁率師進勦命順天府設糧臺心存請發內帑三十二萬兩京倉米二千六百石以給軍食添製軍需火藥又借團防大臣會議京城防守事宜舉光祿寺卿宋晉太僕寺卿王茂蔭綜

理其事並詔允行時議行鈔幣心存疏言軍營搭放票鈔諸多窒碍鈔幣之法施行當有次第此時甫經頒發並未試用勢難驟用之軍營詔斥爲阻撓即責籌次第施行之法俾無阻滯會言官論通州捕役勾結土匪行劫命刑部侍郎文瑞鞫得實心存以徇庇革職四年起授吏部侍郎調戶部擢兵部尙書調吏部六年疏陳江南軍事略曰蘇松常太三府一州及浙之杭嘉湖三府久爲賊所窺伺今甯國先陷逼近宜興向榮近守丹陽溧水句容相繼失守宜責向榮嚴扼丹陽令張國樑率精兵駐宜興扼東壩別簡水師駐太湖庶蘇常兩郡可保無事又近有按畝捐輸失政體竭民財請查明停止是年冬兼翰林院掌院學士以吏部尙書協辦大學士尋調戶部八年充上書房總師傅英法聯軍北犯天津戒嚴心存疏請聖駕還宮以定衆志力言京師重地不可駐外國領事長江形勢不可失綏芬邊地不可捐兵費不可再償傳教不可推廣和議難成宜速進剿湖北巡撫胡林翼奏除漕務中飽之弊請改徵折色心存力贊其議由部定章程五事滿漢兵糧折價支給上下衙門一切陋規概行裁革焉拜體

仁閣大學士管理戶部與肅順同官不相能屢乞病不許九年復固請乃予告去職十年戶部迭興大獄肅順主之多所羅織怡親王載垣等會劾謂司員忠麟王熙震以短號鈔兌換長號曾面啟心存心存回奏部院事非一二人所能專政斷無立談數語改舊章之理載垣等遂請褫頂帶歸案訊質文宗鑒其誣僅以失察議處免傳訊議降五級改俟補官革職留任復以五字商號添支經費心存駁令議減未陳奏司員即列入奏銷下嚴議革職留任是年秋車駕將幸熱河心存上疏切諫十一年文宗崩於行在梓宮還京心存借諸臣迎謁特詔起用以大學士銜管理工部疏舉人材詔嘉其不失以人事君之義又疏言東南之民嚮義甚堅各郡縣陷後流亡渡江者日夜思招練義勇克復鄉里請敕曾國藩擇能辦賊者馳赴通州東臺收拾將散之人心激勵方輿之義旅進擣蘇常退保下河上海一隅賦稅所出宜取江海關無窮之利以供曾國藩有用之兵疏上被嘉納同治元年入直弘德殿借祁寯藻等授穆宗讀兩宮皇太后慎重師傅之選倚畀彌篤是年冬寢疾子安徵巡撫同書方緣事繫獄詔暫

釋侍疾尋卒優詔賜卹稱其品端學粹守正不阿贈太保入祀賢良祠設文端  
賜其孫曾源進士曾榮舉人曾純曾桂並以原官即用曾翰賜內閣中書逾年  
文宗實錄告成以心存曾充監修總裁賜祭一壇子同書同蘇自有傳同爵官  
湖北巡撫

彭蘊章字詠菽江蘇長洲人尙書啓豐曾孫由舉人入賞爲內閣中書充軍機  
章京道光十五年成進士授工部主事仍留直軍機處累遷郎中歷鴻臚寺少  
卿光祿寺少卿順天府丞通政司副使宗人府丞督福建學政遷左副都御史  
二十八年疏言漕船衛官需索旗丁日益增多沿途委員及漕運衙門倉場花  
戶皆有費欲減旗丁幫費宜探本窮源又州縣辦漕應令督撫察其潔己愛民  
者每歲酌保一二員辦理不善者劾一二員運漕官及坐糧廳如能潔己剔弊  
准漕督倉場保奏不稱職者劾罷下部議行擢工部侍郎仍留學政任咸豐元  
年命在軍機大臣上行走四年調禮部尋擢工部尙書五年協辦大學士六年  
拜文淵閣大學士管理工部及戶部三庫事務充上書房總師傅八年京師旱

糧價踴貴旗民生計益艱蘊章奏請撥款採米允之復疏言自改用大錢城中米貴疊荷加恩賑濟又加米折然民生疾苦未見轉機臣聞兵丁所領止有實米二成其餘折色定價每石京錢四千至三千不等大米一石市價京錢三十千持此折價買米不過升斗民生之蹙不獨在無銀並在無米本年海運多於上年可將兵米酌量加增又各營養育兵及鰥寡孤獨小口米不過四萬餘名每名歲支一石六斗擬請此項酌給米毋庸折色自前年以來有提存部庫採買銀又存四川山東山西河南陝西解京米價銀共有四十七萬餘兩堪以採買米石加放兵米又有河南停運節省運脚銀二萬兩堪爲轉運之用伏飭乞部採買以資搭放實於旗兵生計大有裨益疏入下部議行蘊章久直樞廷廉謹小心每與會議必持詳慎鈔票科場諸大獄婉辭調護與肅順等意忤兩江總督何桂清素以才敏自負蘊章誤信之數於上前稱薦十年江甯大營潰蘊章猶言桂清可恃未幾蘇常相繼陷桂清速治文宗以蘊章無知人鑒眷注度衰適有足疾扶掖入直命毋庸在軍機大臣上行走以示體恤尋奏乞罷職出

都就醫詔曰卿久任樞垣備悉時事見在軍務如有見及並探訪輿論民情隨時具疏交地方官大吏代遞蘊章密陳時務六則報聞十一年病痊署兵部尙書尋兼署左都御史同治元年復以病乞休未幾卒依大學士例賜卹諡文敬子祖賢官至湖北巡撫

論曰文宗初政杜受田以師傅最被信任贊畫獨多祁寯藻彭蘊章皆久領樞務翁心存數論軍事久筦度支三人者並與肅順不協先後去位同治初元聯翩復起寯藻心存三朝耆碩輔導沖主一時清望所歸焉

清史稿

列傳一百七十三

文慶

文祥

寶盈

文慶字孔修費莫氏滿洲鑲紅旗人兩廣總督永保之孫也道光二年進士選庶吉士授編修五遷至詹事歷通政使左副都御史內閣學士十二年授禮部侍郎兼副都統十三年總理孝慎皇后喪儀會奏軍民雜髮及停止宴會期限疏中誤引百姓如喪考妣四海遏密八音語下諸臣嚴議宣宗以文慶翰林出身隨聲附和獨重譴褫副都統降三品頂戴尋復之歷吏部戶部侍郎十六年偕尙書湯金釗赴陝西四川按劾巡撫楊名勳布政使李羲文並下嚴議尋復按名勳被訐事褫其職金釗留署陝西巡撫文慶又按河南武陟知縣趙銘彝貪婪狀劾褫職調戶部侍郎十七年命在軍機大臣上學習行走兼右翼總兵命赴熱河偕都統耆英按歷任總管虧短庫款褫職追繳十九年以查辦熱河虧空案內擬罪未晰召問奏對失實下部議罷直軍機二十年典江南鄉試以



上下江中額有誤又私携湖南舉人熊少牧入闈閱卷議褫職二十二年子三等侍衛充庫倫辦事大臣二十三年召授吏部侍郎內務府大臣連擢左都御史兵部尚書二十五年命赴四川借總督將軍按前任駐藏大臣孟保鍾芳等濫提官物劾罷之二十七年復命爲軍機大臣解內務府事務尋署陝甘總督道經河南命察賑務劾玩誤之知縣四人二十八年召授吏部尚書兼步軍統領內務府大臣罷直軍機處兼翰林院掌院學士三十年充內大臣薛執中者甘肅河州人以符咒惑衆至京師藉術醫病朝貴多與往來遂妄議時政談休咎行蹤詭祕爲巡城御史曹楙堅捕治中外大臣牽連被譴者衆文慶曾延治病文宗斥其身爲步軍統領不能立時捕究有乖職守褫職咸豐元年予五品頂戴辦理昌陵工程二年起授內閣學士尋擢戶部尚書復爲內大臣翰林院掌院學士五年復爲軍機大臣協辦大學士題孝靜皇后神主加太子太保拜文淵閣大學士晉武英殿大學士管理戶部充上書房總師傅文慶醞謹持大體宣宗文宗知之深屢躡屐起脊倚不衰時海內多故粵匪猖熾欽差大臣賽

尙阿訥爾經額先後以失律被譴文慶言當重用漢臣彼多從田間來知民疾苦熟諳情偽豈若吾輩未出國門懵然於大計者乎常密請破除滿漢畛域之見不拘資格以用人曾國藩初任軍事屢戰失利忌者沮抑之文慶獨言國藩負時望能殺賊終當建非常之功曾與胡林翼同典試深知其才略屢密薦由貴州道員一歲之間擢至湖北巡撫凡所奏請無不從者又薦袁甲三駱秉章之才請久任勿他調以觀厥成在戶部閱敬銘方爲主事嘗採用其議非所司者亦諮之後卒得諸人力以戡定大難端華肅順漸進用事皆敬憚其嚴正焉六年卒遺疏言各省督撫如慶端福濟崇恩瑛棨等皆不能勝任不早罷恐誤封疆文宗深惜之優詔賜卹嘉其人品端粹器量淵深辦事精勤通達治體贈太保賜金治喪及親奠見其遺孤幼穉時詔加恩入祀賢良祠命其子善聯俟及歲引見弟文玉以罪遣戍即釋回予諡文端善聯官至福州將軍

文祥字博川瓜爾佳氏滿洲正紅旗人世居盛京道光二十五年進士授工部主事累遷郎中咸豐六年京察記名道府因親老乞留京職歷太僕寺少卿

事內閣學士署刑部侍郎八年命在軍機大臣上行走授禮部侍郎歷吏部戶部工部侍郎兼副都統左翼總兵十年英法聯軍犯天津僧格林沁密疏請幸熱河文祥以搖動人心有關大局且塞外無險可扼力持不可借廷臣言之復請獨對退偕同直侍郎匡源杜翰具疏請罷所調車馬明詔宣示中外八月敵氛益熾車駕遽行命文祥署步軍統領司留守從恭親王奕訢議和出入敵營於非分之求侃侃直言折之以理尋以步軍統領難兼顧疏辭改署正藍旗護軍統領十月和議成疏請回鑾以定人心借恭親王等通籌全局疏上善後事宜於是設立總理各國事務衙門恭親王領之滿漢大臣數人文祥任事最專時和局甫定髮捻猶熾兵疲餉竭近畿空虛文祥密疏請選練八旗兵丁添置槍礮於是始立神機營尋命管理營務又疏言僧格林沁兵力單薄勝保所部新募未經行陣既恃僧格林沁保障畿輔必得良將勁卒爲贊助薦副都統富明阿總兵成明綠其軍又薦江西九江道沈葆楨湖北候補知縣劉蓉堪大用疏上並嘉納焉十一年文宗崩於熱河行在穆宗卽位肅順等專政文祥請解

樞務不許十月回鑾借王大臣疏請兩宮皇太后垂簾聽政同治元年連擢左都御史工部尚書兼署兵部尚書爲內務府大臣兼都統二年管理藩院事務東南軍事以次戡定江蘇浙江省城克復議加恩樞臣固辭三年江甯復首逆就殲捷至加太子太保子姪凱肇員外郎四年署戶部尚書辭內務府大臣允之是年秋馬賊入喜峰口命文祥率神機營兵防護東陵督諸軍進勦賊遁灤陽疏陳地方官竅賊釀患請除積弊清盜源馬賊巢穴多在奉天昌圖廳八面城熱河八溝哈達等處請購線偵察調兵掩捕庶絕根株事定回京文宗奉安山陵賜其子熙聯員外郎尋以母病請假三月回旗迎養奉天馬賊方熾命率神機營兵往勦增調直隸洋槍隊出關約束三盟蒙古王公由北路夾擊破賊於錦州東井子謀知賊將劫奉天獄約期攻城兼程馳援賊退踞城東南圍撫順令總兵劉景芳夜擊破之賊遁出邊遣軍趨吉林五年春解長春廳圍追賊至昌圖朝陽坡分三路進擊十數戰皆捷擒斬三千餘賊首馬傻子竄蹙乞降磔之留兵餉授將軍都興阿俾清餘孽請蠲奉天地丁銀米停鋪捐回京調吏

部尙書文宗實錄成賜子熙治員外郎八年丁母憂特賜諭祭百日假滿病未出天津教案起力疾還朝十年以吏部尙書協辦大學士十一年拜體仁閣大學士文祥自同治初年偕恭親王同心輔政總理各國事務以一身負其責洋情壽幻朝論紛紜一以忠信持之無諉卸洎穆宗親政臚陳歷年洋務情形因應機宜甚備莫有啟悟既而恭親王以阻圓明園工程忤旨斥罷文祥涕泣偕同列力諫幾同讒恭親王尋復職而自屢遭挫折後任事不能如初文祥正色立朝爲中外所嚴憚朝局賴以維持不致驟變十三年病久不瘳在告會日本窺臺灣強出籌戰守疏請敕下戶部內務府寬籌餉需裁減浮用停不急之作謀至急之海防俾部臣疆臣皆得專力圖維皇上憂勤惕厲斯內外臣工不敢蹈玩泄之習否則狃以爲安不思變計恐中外解體人心動搖其患有不可勝言者言甚切至是年冬穆宗崩德宗繼統卽位晉武英殿大學士以久病請罷溫詔慰留解諸兼職專任軍機大臣及總理各國事務時國家漸多故文祥深憂之密陳大計疏曰洋人爲患中國愈久愈深而其窺伺中國之間亦愈熟

愈密從前屢戰屢和迄無定局因在事諸臣操縱未宜及庚申定約設立衙門專司其事以至於今未見決裂就事論事固當相機盡心辦理而揣洋人之用心求馭外之大本則不係於此所係者在人心而已矣溯自嘉慶年間洋人漸形强悍始而海島繼而口岸再及內地蓄力厲精習機器以待中國之間一逞其欲道光年間肆掠江浙自江甯換約以後覬覦觀望直至粵匪滋事以爲中國有此犯上作亂之事人心不一得其間矣於是其謀遂洩闖入津門雖經小挫而其意愈堅致有庚申之警然其時勢局固危民心未二勤王之師雖非勁旅而聞警偕來奸細之徒雖被誘脅而公憤同具以是得受驅磨成此和局十餘年來仰賴皇太后皇上勵精圖治宵旰勤勞無間隙之可尋在事諸臣始得遇事維持未至做絆偶有干求尙能往返爭持不至太甚非洋務之順手及在事者折衝之力皆我皇太后皇上朝乾夕惕事事期符民隱人心固結有以折外族之心而杜未形之患也然而各國火器技藝之講求益進彼此相結之勢益固使臣久駐京師聞我一政之當則憂一或不當則喜其探測愈精俄人逼

於西疆法人計占越南緊接滇粵英人謀由印度入藏及蜀蠢蠢欲動之勢益不可遏所伺者中國之間耳所甚者中國大本之未搖而人心之難違耳說者謂各國性近犬羊未知政治然其國中偶有動作必由其國主付上議院議之所謂謀及卿士也付下議院議之所謂謀及庶人也議之可行則行否則止事必合乎民情而後決然行之自治其國以此其觀他國之廢興成敗亦以此儻其國一切政治皆與民情相背則各國始逞所欲爲取之恐後矣如土耳其希臘等國勢極弱小而得以久存各大國之間者其人心固也強大如法國而德國得以勝之者以法王窮侈任性負國債之多不可復計雖日益額餉以要結兵心而民心已去始有以乘其間也夫人必自侮而後人侮之物必先自腐而後蟲生焉理之所在勢所必至中國之有外國猶人身之有疾病病者必相證用藥而培元氣爲尤要外國無日不察我民心之向背中國必求無事不愜於民心之是非中國天澤分嚴外國上議院下議院之設勢有難行而義可采取凡我用人行政一舉一動揆之至理度之民情非人心所共愜則急止勿爲

事係人心所共快則務期於成崇節儉以裕帑需遇事始能有備納諫諍以開  
言路下情藉以上通總期人心永結大本永固當各外國環伺之時而使之無  
一問可乘庶彼謀不能卽遂而在我亦堪自立此爲目前猶可及之計亦爲此  
時不能稍緩之圖若待其間之既開而欲爲斡旋補苴之法則和與戰俱不可  
恃卽使仍可苟安而大局已不堪復問則何如預防其間之爲計也咸豐六年  
王茂蔭奏陳夷務謂海外諸國日起爭雄白人視之雖有中外之分自天視之  
殆無彼此之意引書言皇天無親惟德是輔及大學平天下章三言得失首人  
心次天命而終以君心爲證何其言之危且切歟欲戢夷心莫要於順民心能  
順民心斯足以承天心固不待善蔡而昭然若睹耳臣受恩最重辦理洋務最  
久實有見於洋人居心積慮之處而現時尤爲迫切緊要之關外國之求問在  
此中國之彌問亦在此在事諸臣僅謀其末我皇上實操其本用敢直陳伏乞  
俯察芻言將此摺時置左右力求端本之治以迺隱患之萌天下幸甚先是當  
臺灣事平文祥卽偕恭親王議興海防條上六事曰練兵曰簡器曰造船曰籌



餉曰用人曰持久各具條目敕下中外大臣會議至光緒二年疆臣覆奏將復下廷議文祥已病不能出自知且不起乃密疏上曰馭外之端爲國家第一要務現籌自強之計爲安危全局一大關鍵臣衰病侵尋心長智短知不能永效犬馬以報主知恐一旦填溝壑則平生欲言未言之隱無以上達宸聽下資會議何以對陛下此心耿耿有非總理衙門原奏所能盡者敢竭誠吐赤爲我皇上敬陳之夫敵國外患無代無之然未有如今日之局之奇患之深爲我敵者之多且狡也果因此患而衡慮困心自立不敗原足作我精神惺我心志厲我志氣所謂生於憂患者正在於此至此而復因循泄沓一聽諸數而莫爲之籌卽偶一籌念而移時輒忘或有名無實大局將不堪設想而其幾不待智者而決矣從前夷患之熾由於中外之情相隔和戰之見無定疆吏又遇事粉飾其情形不能上達於朝廷坐是三失而其患遂日久日深無所底止泰西各國官商一氣政教並行各商船遠涉重洋初至中華處處受我侮抑事事被我阻塞其情鬱而不能不發者勢也繼而見中國官之阻之者可以通抑之者可以伸

必不可破之格或取勝於兵力之相迫而卒無不破此中國之爲所輕而各國漸收恣肆之機也迨至立約通商已有成議而在內無深知洋務之大臣在外無究心撫馭之疆吏一切奏牘之陳類多數衍諱飾敵人方桀驁而稱爲恭順洋情方怨毒而號爲懼怖遂至激成事端忽和忽戰甚且彼省之和局甫成此省之戰事又起賠款朝給捷書暮陳乘遭風之船以爲勝仗執送信之曾以爲擒渠果至兩軍相交仍復一敗不可收拾於是夷情愈驕約款愈肆中外大臣皆視辦理洋務爲畏途而庚申衅起幾至無可措手自設立總理衙門其事始有責成情形漸能熟悉在事諸臣亦無敢推諉然其事非在事諸臣之事而國家切要之事也既爲國家切要之事則凡爲大清臣子者無人不應一心謀畫以維大局況和局之本在自強自強之要在武備亦非總理衙門所能操其權盡其用也使武備果有實際則於外族要求之端持之易力在彼有顧忌覲覲亦可潛消事不盡屬總理衙門而無事不息息相關也乃十數年來遇有重大之端安危呼吸之際事外諸臣以袖手爲得計事甫就緒異議復生或轉託於

成事不說不問事之難易情形若何一歸咎於任事之人是從前之誤以無專責而仔肩乏人今日之事又以有專屬而藉口有自設在事諸臣亦同存此心爭相諉謝必至如唐臣杜甫詩中所謂獨使至尊憂社稷矣夫能戰始能守能守始能和宜人人知之今日之敵非得其所長斷難與抗稍識時務者亦詎勿知乃至緊要關鍵意見頓相背往往陳義甚高鄙洋務爲不足言抑或苟安爲計覺和局之深可恃是以歷來練兵造船習器天文算學諸事每興一議而阻之者多即就一事而爲之者非其實至於無成則不咎其阻撓之故而責創議之人甚至局外紛紛論說以國家經營自立之計而指爲敷衍洋人所見之誤竟至於此今日日本擾臺之役業經議結日本尙非法英俄美之比此事本屬無名之師已幾幾震動全局費盡筆舌戰始就範圍若泰西強大各國環而相同得中國一無理之端藉爲名義構兵而來更不知如何要挾如何挽回之念及此真有食不下咽者則自強之計尙可須臾緩哉此總理衙門奏請飭令會議諸條實爲緊要關繫不可不及早切實籌辦者也今計各疆吏遵旨籌議指

日將依限上陳如飭下廷議非向來會議事件可比應由各王大臣期定數日  
詳細審商將事之本末始終一律貫澈利害之輕重條議之行止辦法切實折  
中定見無蹈從前會議故習如今日議之行之而異日不能同心堅持則不如  
不辦如事雖議行而名是實非徒爲開銷帑需增益各省人員差使名目亦不  
如不辦度勢揆時料敵審己實有萬萬不能不辦之勢亦實有萬萬不可再誤  
之機一誤卽不能復更不辦卽不堪設想總理衙門摺內所謂必須上下一心  
內外一心局中局外一心且歷久永遠一心卽此意也而大本所在尤望我皇  
上切念而健行之總理衙門承辦之事能否維持全視實力之能否深恃必確  
有可戰可守之實庶可握不戰之勝惟我皇上念茲在茲則在事諸臣之苦心  
自能上邀宸鑒凡百臣工亦人人有求知此事共籌此事之心其才識智力必  
有百倍於臣者否則支持既難變更不免變而復合痛心之端必且百倍今日  
非臣之所忍言矣疏上未幾卒溫詔賜卹稱其清正持躬精詳謀國忠純亮直  
誠懇公明爲國家股肱心膂之臣贈太傅子騎都尉世職入祀賢良祠賜銀三

千兩治喪遣員勒載激奠醴設文忠歸葬盛京命將軍崇實往賜祭十五年皇太后歸政追念前勞賜祭一壇文祥忠勤爲中興樞臣之冠清操絕人家如寒素謀國深遠當新疆軍事漸定與俄國議交還伊犁大學士左宗棠引以自任文祥力主之奏請專任文祥既歿後乃遣侍郎崇厚赴俄國爲所迫脅擅允條款朝論譁然譴罪崇厚易以曾紀澤往久之乃定議幸免大釁法越事起和戰屢更以海防疏不能大創敵遷就結局及興海軍未能竭全力以成之卒挫於日本皆如文祥所慮而朝局數變日以多事矣子熙治以員外郎襲騎都尉世職

寶鋈字佩蘅索綽絡氏滿洲鎮白旗人世居吉林道光十八年進士授禮部主事擢中允三遷侍讀學士咸豐二年粵匪竄兩湖寶鋈疏請鄰近諸省力行堅壁清野之策四年命往三音諾顏部賜奠謝絕餽贖外藩敬之擢內閣學士五年遷禮部侍郎兼正紅旗蒙古副都統調戶部八年典浙江鄉試以廣額加中官生一名坐違制醵一級留任文宗諭寶鋈素以果敢自命亦同階徇特嚴斥

焉十年命赴天津驗收海運漕糧復赴通州察視迭疏請定杜弊章程並勅監督貽誤如所請行任總管內務府大臣署理戶部三庫事務會辦京城巡防時英法聯軍內犯車駕幸熱河既至命提庫帑二十萬兩修葺行宮寶盃以國用方亟持不可上怒欲加嚴譴會所管三山被掠詔切責降五品頂戴諭月後以巡防勞動復之兼鎮紅旗護軍統領復兼署正紅旗漢軍都統左翼前鋒統領十一年文宗崩於行在十月穆宗回京命在軍機大臣上行走並充總理各國事務大臣同治元年擢戶部尚書二年奏劾壽莊公主府首領太監張玉蒼出言無狀嚴旨逮訊玉蒼治如律三年命大臣輪班進講治平寶鑑寶盃與焉江甯克復以翊贊功加太子少保賜花翎四年命佩帶內務府印鑰尋以樞務事繁請解內務府大臣職允之自設立總理各國事務衙門始求通知外國語言文字置同文館肄習西學廷臣每以爲非六年都察院代奏職員楊廷熙上書請撤同文館語涉恭親王及寶盃等專擅挾持於是寶盃借恭親王請罷直候查辦溫詔慰留勉以不避嫌疑勿因浮言推諉七年直東捻匪肅清加軍功二

級十一年調吏部穆宗大婚禮成加太子太保十二年兼翰林院掌院學士以吏部尙書協辦大學士尋調兵部拜體仁閣大學士管理吏部光緒三年晉武英殿大學士四年回疆肅清被優敘寶鋆自同治初年預樞務借文祥和衷翊贊通達政體知人讓善恭親王資其襄助至是朝列漸分戶門文祥既歿議論益紛編修何金壽因旱災劾樞臣不職請加訓責詔斥恭親王寶鋆等目擊時艱毫無補救嚴議革職加恩改留任五年以題穆宗神主加太子太傅復以寶鋆告成推恩其子景澧晉秩郎中姪景星賜舉人七年庶子陳寶琛以星變陳言專劾寶鋆請仿漢災異策免三公故事立予罷斥詔曰寶鋆在軍機大臣上行走有年尙無過失陳寶琛謂其畏難巧卸瞻徇情面亦不能確有所指惟既有此奏自平時與王大臣等議事未能和衷共濟致啓人言該大學士受恩深重精力尙健自當恪矢公忠勉圖報稱務宜殫精竭慮力戒因循積習用副委任十年三月軍機大臣自恭親王以下同日斥罷詔寶鋆入直最久責備宜嚴姑念年老特錄前勞全其末路以原品休致十二年皇太后懿旨加恩改以大

學士致仕賞食半俸寶鋆退休後時借恭親王居西山游覽唱和年逾八十恩  
賞猶及十七年卒遺疏入詔褒其忠清亮直練達老成贈太保祀賢良祠擢子  
景澧四品京堂賜孫蔭桓舉人遣員勒載溁奠醑飾終之典視在位無所減諡  
文靖子景澧官至廣州將軍卒諡誠慎孫蔭桓光緒二十四年進士歷官國子  
監司業改乾清門頭等侍衛

論曰咸同之間內憂外患岌岌不可終日文慶倡言重用漢臣俾曾國藩胡林  
翼等得展經猷以建中興之業其功甚偉文祥寶鋆贊恭親王和輯邦交削  
平寇亂文祥尤力任艱鉅公而忘私爲中外所倚賴而朝議未一猶不能盡其  
規略晚年密陳大計於數十年馭外得失洞如觀火一代興亡之龜鑑也寶鋆  
明達同之貞毅不及遂無以鎮紛囂而持國是如文祥者洵社稷臣哉



清史稿

列傳一百七十四

宗室肅順

穆蔭

陳孚恩

宗室肅順字雨亭鄭親王烏爾恭阿第六子也道光中考封三等輔國將軍授委散秩大臣奉宸苑卿文宗即位擢內閣學士兼副都統護軍統領鑾儀使以其敢任事漸嚮用咸豐四年授御前侍衛遷工部侍郎歷禮部戶部七年擢左都御史理藩院尙書兼都統時寇亂方熾外患日深文宗憂勤要政多下廷議肅順恃恩眷其兄鄭親王端華及怡親王載垣相爲附和擠排異己廷臣咸側目八年調禮部尙書仍管理藩院事又調戶部會英法聯軍犯天津起前大學士耆英隨欽差大臣桂良花沙納往議約耆英不候旨回京下獄議罪擬絞監候肅順獨具疏請立予正法上雖斥其言過當即賜耆英自盡大學士柏後典順天鄉試以縱容家人斬祥舞弊命肅順會同刑部鞫訊讞大辟上念柏後舊臣獄情可原欲寬之肅順力爭遂命斬戶部因軍興財匱行鈔置寶鈔處行大

錢置官錢總局分領其事又設官號招商佐出納號乾字者四字字者五鈔幣大錢無信用以法令強行之官民交累徒滋弊竇肅順察寶鈔處所列字字五號欠款與官錢總局存檔不符奏請究治得朦混狀視司員台斐音等職與商人併論罪籍沒者數十家又劾官票所官吏交通視關防員外郎景雯等職籍沒官吏亦數十家大學士祁寯藻翁心存皆因與意見不合齟齬不安於位而去心存且幾被重罪肅順日益驕橫睥睨一切而喜延攬名流朝士如郭嵩燾尹耕雲及舉人王閻運高心夔輩皆出入其門采取言論密以上陳於勦匪主用湘軍曾國藩胡林翼每有陳奏多得報可長江上游以次收復左宗棠爲官文所劾賴其調護免罪且破格擢用文宗之信任久而益專自八年桂良等在天津與各國議和廷議於遣使入京一條堅不欲行迄未換約九年乃有大沽之戰敵却過十年英法聯軍又來犯僧格林沁拒戰屢失利復遣桂良等議和敵軍近逼通州乃改命怡親王載垣尙書穆蔭往議誘禽英官巴夏禮置之獄而我軍屢敗之餘不能戰車駕倉猝幸熱河廷臣爭之不可事多出肅順所贊

畫遂扈從泊敵軍入京師恭親王留京主和議議即定敵軍漸退留京王大臣  
領請回鑾肅順謂敵情叵測力阻而罷肅順先已授御前大臣內務府大臣至  
是以戶部尙書協辦大學士署領侍衛內大臣行在事一以委之十一年七月  
上疾大漸召肅順及御前大臣載垣端華景壽軍機大臣穆蔭匡源杜翰焦祐  
瀛入見受顧命上已不能御硃筆諸臣承寫焉穆宗即位肅順等以贊襄政務  
多專擅御史董元醇疏請皇太后垂簾總政肅順等梗其議擬旨駁斥非兩宮  
意抑不下載垣端華等負氣不視事相持逾日卒如所擬又屢阻回鑾恭親王  
至行在乃密定計九月車駕還京至卽宣示肅順載垣端華等不法狀下王大  
臣議罪肅順方護文宗梓宮在途命睿親王仁壽醇郡王奕譞往逮捕諸密雲  
夜就行館捕之咆哮不服械繫下宗人府獄見載垣端華已先在叱曰早從吾  
言何至今日載垣咎肅順曰吾罪皆聽汝言成之也獻上罪皆凌遲詔謂擅政  
阻皇太后垂簾三人同罪而肅順擅坐御位進內廷出入自由擅用行宮御用  
器物傳收應用物件抗違不遵並自請分見兩宮皇太后詞氣抑揚意在構釁

其悖逆狂謬較載垣端華罪尤重賜載垣端華自盡斬肅順於市肅順攬權立威數興大獄輿論久不平奏減八旗俸餉尤府怨就刑時道旁觀者爭擲瓦礫鄙人稱快肅順既伏法詔逮所與交結之內監杜雙奎袁添喜等置重典其被威脅者概免株連著英子慶錫呈訴其父爲肅順所陷請昭雪詔以著英罪當死肅順奏過當文宗已斥之特錮肅順子不得入仕以示戒

穆蔭字清軒托和絡氏滿洲正白旗人官學生考授內閣中書充軍機章京遷侍讀咸豐元年命以五品京堂候補在軍機大臣上學習行走尋除國子監祭酒故事非科甲不與斯職部臣執奏特旨仍授之懋光祿寺卿內閣學士兼副都統三年粵匪擾河南直隸京師戒嚴命偕僧格林沁花沙納達洪阿辦理京旗各營巡防事宜遷禮部侍郎著左翼總兵尋調刑部八年擢理藩院尙書兼都統調兵部十年命偕怡親王載垣赴通州與英法聯軍議和解桂良等欽差大臣關防授之議不諧命禽諸酋獲巴夏禮送京敵軍益逼詔斥穆蔭等辦理不善撤回扈從熱河丁父憂予假十四日命俟回京補行持服十一年文宗崩

借肅順等同受顧命贊襄政務十月肅順載垣端華等伏法穆蔭與匡源杜翰  
焦祐瀛並能直軍機議罪及議上詔曰穆蔭等於載垣等竊奪政柄不能力爭  
均屬辜恩溺職穆蔭在軍機大臣上行走最久班次在前情節尤重王大臣等  
擬請將穆蔭革職發往新疆效力贖罪咎有應得惟以載垣等兇殘方張受其  
箝制均有難與爭衡之勢其不能振作尙有可原著即革職加恩改發軍臺效  
力贖罪匡源杜翰焦祐瀛皆革職免其遣戍穆蔭詣戍三年論贖歸歿於家杜  
翰附其父受田傳匡源字鶴泉山東膠州人道光二十年進士選庶吉士授編  
修累官吏部侍郎咸豐八年入直軍機謙退無所建白罷官後清貧主講濟南  
深源書院以終焦祐瀛字桂樵直隸天津人道光十九年舉人考授內閣中書  
充軍機章京累遷光祿寺少卿十年命赴天津靜海諸縣治團練召回從幸熱  
河命在軍機大臣上學習行走遷太僕寺卿祐瀛尤諂事肅順等諸詔旨多出  
其手爲時所指目故同敗

陳孚恩字子鶴江西新城人道光五年拔貢授吏部七品小京官升主事充軍

機章京累遷郎中大學士穆彰阿領樞務深倚之懋太僕寺少卿通政司副使太僕寺卿皆留直遷大理寺卿左副都御史兼署順天府尹工部侍郎擢倉場侍郎二十七年調署兵部侍郎在軍機大臣上行走偕侍郎柏葰赴山東按事劾巡撫崇恩庫款虧缺捕務廢弛罷之暫署山東巡撫授刑部侍郎回京面陳在署任不受公費詔嘉之特加頭品頂帶紫禁城騎馬賜匾額曰清正良臣皆異數二十九年偕侍郎福濟赴山西按巡撫王兆琛貪婪事得實褫兆琛職逮京治罪調工部署刑部尙書尋實授三十年宣宗崩遺命罷配郊祔廟下王大臣議文宗召對孚恩與怡親王載垣等爭論於上前載垣等以失儀自劾詔原其小節予薄譴而斥孚恩乖謬降三級留任孚恩尋以母老乞養回籍允之咸豐元年命在籍幫辦團練三年九江陷巡撫張芾出督師孚恩與司道守省城既而賊由安徽回竄上游命偕芾籌防賊犯南昌孚恩偕芾固守江忠源援師至力戰相持九十餘日賊始引去以守城功賜花翎七年母喪畢到京未有除授八年御史錢桂森疏言孚恩才練識明在外數年多所閱歷儻仍入直樞廷

或使治洋務必能有濟詔斥朋比罷桂森言職回原衙門久之命孚恩以頭品頂戴署兵部侍郎又署禮部尙書授兵部尙書會鞫順天鄉試關節獄牽涉其子景彥自請嚴議並迴避得旨褫景彥職除涉景彥者仍責會訊僅議失察降一級准抵銷尋兼署刑部戶部尙書調授吏部尙書初孚恩以議禮忤載垣端華肅順等及再起乃隱附諸人冀固位肅順等既敗少詹事許彭壽疏請治黨援論形迹最著莫如孚恩最密莫如侍郎劉崑黃宗漢平日所薦舉者則有侍郎成琦太僕寺少卿德克津太候補京堂富績等於是諸臣盡黜詔謂孚恩當大行皇帝行幸熱河命諸臣議可否孚恩有竊負而逃避海濱而處之語意在迎合載垣等大行皇帝上賓留京諸大臣中獨召孚恩一人赴行在足證爲載垣等心腹革職永不叙用時廷臣議郊壇配位孚恩言前議宣宗配位時大行皇帝有定爲三祖六宗之諭出於大學士杜受田所擬非大行皇帝意王大臣等用其言仍請文宗配祀許彭壽復引據文宗御製詩有以後無須變更之句請下廷臣再議議不配祀詔斥孚恩謬妄又以籍肅順家得孚恩私書有暗昧

不明語乃逮孚恩下獄籍其家追繳宣宗賜額遣戍新疆居數年伊犁被兵將軍常清等奏孚恩籌餉治軍有勞命免戍留助理兵餉同治五年伊犁陷孚恩及妾黃子景和媳徐孫小連同殉難事聞但卹其家屬孚恩不與焉

論曰文宗厭廷臣習於因循乏匡濟之略而肅順以宗潢疏屬特見倚用治事嚴刻其尤負謗者殺者英柏俊及戶部諸獄以執法論諸人罪固應得第持之者不免有私嫌於其間耳其贊畫軍事所見實出在廷諸臣上削平寇亂於此肇基功不可沒也自庚申議和後恭親王爲中外所繫望肅順等不圖和衷共濟而數阻返蹕文宗既崩冀佔權位於一時以此罹罪赫赫爰書其能迨乎穆蔭諸人或以愿諾取容或以附和希進終皆不免於斥逐如陳孚恩者鄙夫患失反覆靡常淪絕域而不返宜哉



清史稿

列傳一百七十五

桂良

瑞麟

官文

文煜

桂良字燕山瓜爾佳氏滿洲正紅旗人閩浙總督玉德子入貲爲禮部主事晉員外郎出爲四川順慶知府調成都歷建昌道河南按察使四川廣東江西布政使道光十四年擢河南巡撫嘉慶中林清李文成等以八卦教倡亂既誅而汲縣潞州屯墳塔猶祀其神曰無生老母習教者猶衆御史黃樹滋以爲言命桂良察治毀其墳廟廉得河南境內無生廟二十九所並毀之地方官失察譴黜有差十九年擢湖廣總督調閩浙又調雲貴二十年兼署雲南巡撫滇省多盜奏定緝捕章程又請迤南迤西迤東各標營官兵責成巡道就近稽察時貴州諸苗蠢動鎮遠黎平都勻古州苗尤悍州縣不能制疏請邊勁兵專主勦捕二十五年入覲留京署兵部尙書兼正白旗漢軍都統尋出爲熱河都統二十八年召來京以其女妻皇六子奕訢授鑲紅旗漢軍都統咸豐元年署吏部尙

書出爲福州將軍二年召授兵部尙書三年粵匪陷江甯京師戒嚴桂良疏請各城門稽查增派八旗章京兵丁補葺城上兵房從之未幾粵匪竄河北直隸總督訥爾經額出省防勦命桂良駐保定爲後路聲援兼防西路要隘望都唐縣土匪起捕誅之是年秋賊由山西犯畿南訥爾經額師潰於臨洺關隆平柏鄉相繼陷訥爾經額褫職逮治授桂良直隸總督詔責借都統勝保速籌防勦布政使張集馨出兵遷延劾罷之賊竄正定定州深州河間天津勢劇甚於是桂良率提督張鼎元守保定科爾沁郡王僧格林沁統大兵駐通州衛京師勝保督師進勦四年大捷於獨流鎮賊走踞阜城又走連鎮僧格林沁勝保會攻賊分竄山東勝保追擊之桂良遣張鼎元赴武邑防堵勦散秩大臣穆裕健銳營翼長雙信縱兵傷官擾民議譴秋英吉利美利堅兩國兵船至大沽時賊氛未靖詔戒張皇命桂良相機辦理尋以前任鹽政崇綸歸調遣令赴天津會議英酋咆哮要索十六條欲遣官駐京及踐廣州入城之約中外官平禮接見通商稅則變通舊約美酋麥蓮則僅言通商一端崇綸等駁拒其駐京餘事令赴

廣東聽總督查辦屢議無要領咆哈等尋去五年僧格林沁連大破賊賊首林鳳祥李開方先後就擒伏誅畿輔肅清七年召拜東閣大學士管理刑部兼正藍旗蒙古都統八年春英法俄美四國聯軍北犯燬大沽礮臺泊天津城下聲言將犯京師倉猝援軍未集命桂良偕尙書花沙納往議敵情猖肆要求益多以遣官駐京內江通商內地游行兵費賠償後始交還廣東省城四事廷議不允復起故大學士耆英同與議英人尤不悅拒之耆英以擅回京獲罪桂良等議久不決廷臣多主戰實不足恃而敵日以進兵爲恐嚇俄美兩國調停其間卒徇所請定議而通商稅則俟於上海詳定之五月簽約退兵遂命桂良偕花沙納赴上海武備院卿明善刑部員外郎段承實副之會同兩江總督何桂清議稅則文宗愼和約之成出於不得已或獻策許全免入口稅以市惠冀改易駐京諸條密授桂良等機宜八月至上海晉文華殿大學士授內大臣桂清力言免稅之不可改約之難成桂良亦贊其議上甚怒必責其補救一二端而各國因廣東民團仍與爲難且出示僞載諭旨堅欲罷兩廣總督黃宗漢停撤民

團桂良等疏聞乃解宗漢通商大臣改授桂清桂良等等不敢言罷駐京諸事先議稅則十二月英使額羅金遽率兵船赴廣東遂罷議九年回京僅美利堅一國遵換通商之約英軍復犯大沽僧格林沁預設備兵至擊退之十年英法聯軍大舉來犯我師失利七月復命桂良赴天津議和要增兵費入京換約嚴詔拒絕敵陷天津進逼京師上幸熱河恭親王奕訢留守主撫議桂良與焉九月於禮部換約視八年原議益增條款事具邦交志尋命督辦各國通商事務十一年穆宗即位回京命在軍機大臣上行走同治元年卒優卹贈太傅祀賢良祠諡文端

瑞麟字澄泉葉赫那喇氏滿洲正藍旗人由文生充太常寺讀祝官補贊禮郎道光二十七年給祭太廟讀祝洪亮宣宗嘉之賜五品頂戴花翎二十八年超擢太常寺少卿又擢內閣學士兼管太常寺三十年擢禮部侍郎咸豐元年兼鎮藍旗滿洲副都統正黃旗護軍統領三年調戶部命在軍機大臣上行走時粵匪竄畿輔踞靜海縣及獨流鎮命瑞麟率兵從僧格林沁防勦會攻獨流克

之靜海賊竄陷阜城又分竄連鎮及山東高唐州瑞麟合擊屢有禽斬五年克連鎮賊首林鳳祥就禽加都統銜賜號巴達琅阿巴圖魯授西安將軍未幾擢禮部尚書兼鎮白旗蒙古都統八年英兵犯天津命馳赴楊村籌防泊撫議定敵退文宗知和不可恃亟治海防命瑞麟赴天津修築大沽礮臺尋署直隸總督增建雙港礮臺調福建運船戰船增募水師僧格林沁移師天津分駐要隘瑞麟回京調戶部尚書拜文淵閣大學士兼管禮部鴻臚寺太常寺九年管理戶部十年充殿試讀卷官授內大臣六月英法聯軍復犯天津命率京兵萬人守通州僧格林沁屢戰失利敵軍進通州瑞麟借勝保禦之八里橋左右夾擊勝保傷礮墜馬軍潰敵遂逼京師瑞麟迎戰安定門外敗績褫職車駕幸熱河命扈從行在是年冬和議成予侍郎銜隨僧格林沁勦山東捻匪攻鉅野羊山集賊巢失利馬蹶被傷退軍濟甯復褫職召回京十一年授鎮黃旗漢軍都統管神機營事同治元年出爲熱河都統疏請招佃圍邊荒地八千頃充練餉允之二年調廣州將軍四年兼署兩廣總督信宜化州土匪起遣兵平之粵匪汪

海洋由福建竄廣東大埔道副將方耀擊走之入閩會勦復詔安和平賊復竄廣東境連敗之於長樂鎮平時賊蹤往來於福建廣東江西界上瑞麟偕左宗棠疏請三省會勦詔提督鮑超由江西來援四面環攻十二月殲僞偕王譚體元於黃沙壩禽首逆汪海洋誅之餘賊肅清捷聞優詔嘉獎五年實授兩廣總督廣東素多盜伏莽時起時巡撫蔣益澧號知兵瑞麟部將方耀鄭紹忠皆能戰先後破斬五坑客匪曹溪赤坑及新安東莞諸匪潮州瓊州洋盜土匪九年兼署巡撫十年復拜文淵閣大學士仍留總督任十三年卒詔嘉前勞贈太保祀賢良祠諡文莊子懷塔布由廢生授刑部主事晉員外郎以父卹典擢四品京堂累遷禮部尚書充內務府大臣光緒二十四年主事王照上書言事久之始代奏坐違旨抑格褫職未幾太后訓政起授左都御史復充內務府大臣遷理藩院尚書二十六年卒贈太子少保諡恪勤

官文字秀峰王佳氏滿洲正白旗人先隸內務府正白旗漢軍由拜唐阿補藍翎侍衛累擢頭等侍衛道光二十一年出爲廣州漢軍副都統調荊州右翼副

都統粵匪既陷漢陽將犯荊州咸豐三年將軍台湧駐防德安命官文專統荊州防兵四年擢荊州將軍賊陷安陸荊門宜昌時荊州兵多調赴武昌分屯要隘城中兵僅二千監利又陷官文遣軍復之連復宜昌石首華容於是荊州稍安而武昌被圍急官文遣將沿漢下援六月武昌復失守命官文統籌全局規復武漢因疏言賊情詭譎軍情隨時變幻武漢之賊一日不盡荊州不得安枕賊踞漢陽倚江爲險絕我糧道阻我援軍今欲復武昌必先攻漢陽奪賊所恃之險而後武昌可圖也總兵雙保自潛江進勦兵力過單臣已令羅遵殿以戰船百艘自仙桃鎮蔡店巡趨漢陽與撫臣楊需分道夾攻又檄總兵福忻往助雙保知縣吳振鏞進復沔陽以通餉道惟賊踞岳州南北援軍均受牽制尤應先勦岳州之賊曾國藩方統礮船駐湘陰塔齊布之師已入岳州境臣已促其速進分兵阻江路復派同知銜李光榮等率川勇防調絃口張子銘防監利尺八口都司宗維清沿江接應荊州僅贖旗兵分守要隘隨時接應庶幾可進可退不致有顧此失彼之虞疏入報聞尋曾國藩克岳州賊艘悉出大江官文遣

涼州副都統魁玉總兵楊昌泗赴螺山防江殲賊甚多八月武昌漢陽相繼復論功被優叙五年總督楊需帥潰德安漢陽漢口復陷德安隨州繼之詔覆需職授官文湖廣總督師次安陸疏言賊自隨州退踞德安兇鋒疊挫惟天門京山道路四通僮竄襄河勾連仙桃鎮以下股匪不獨荆襄在在堪虞上游各處均可北竄見遣兵一由天門阜市進勦一往京山防守臣駐安陸爲兩路應援咨固原提督孔廣順伺隙進取署提臣訥欽爲後應俟欽差大臣西凌阿入楚即統兵從襄河兩岸水路並進由漢川攻漢陽秋西凌阿戰德安失利乃命官文代爲欽差大臣馳援德安賊棄城走躡追之直搗漢陽十二月督兵薄西門橋迭敗賊於龜山尾湖隄五顯廟破賊卡燬東西土城六年賊造浮橋從西門分隊來犯擊却之分兵河口斷其糧道令副都統都興阿攻團風圍焚積聚賊勢漸蹙秋破漢陽城外賊營連戰皆捷巡撫胡林翼規復武昌十一月約同日水陸大舉分攻武漢官文督軍分路進水師擊漢陽東門破五顯廟賊卡李孟羣又敗龜山援賊王國才楊昌泗由西門攻入遂復漢陽俘僞將軍等五百餘



人林翼亦復武昌詔嘉獎賜花翎七年偕林翼疏言湖北爲長江上游要害武漢尤九省通衢自來東南有事必爭之地三次失陷力攻兩載而後克之目前相機防勦不令賊乘間上竄蹈從前覆轍業派李續賓由南岸都興阿孔廣順王國才由北岸楊載福率水師由江路分道進勦見北岸黃州至黃梅南岸武昌至興國均已肅清崇通一帶搜捕殆盡李續賓抵九江與曾國藩會合進攻揚載福燬城外賊營惟小池口賊壘未拔派鮑超助攻安徽之英山太湖宿松望江接壤湖北皆爲賊藪有窺伺上犯之心飭王國才駐黃梅之大河鋪界嶺巖孔廣順駐蘄水之孔隴驛巴揚阿率馬隊爲各路應援以固楚北門戶道士泐水關溜急田家鎮兩山對峙水師皆難久駐酌留各營游巡江面足備鎮馭通籌大局我軍已據水陸上游實蕃破竹建瓴之勢所慮江西七府未平武昌尙有肘腋之患賊若由通城崇陽興國竄過武昌反出江西各軍之上自當固守武昌以爲後路根本相機籌畫節節進取仍步步嚴防庶軍情無返顧掣肘之虞轉餉有源源不竭之利疏入報聞初官文由荊州將軍調總督凡上游荆

宜襄鄖諸郡兵事餉事悉主之林翼以巡撫駐金口凡下游武漢黃德諸郡兵  
事餉事悉主之南北軍各領分地徵兵調餉每有違言武昌既復林翼威望日  
起官文自知不及思假以爲重林翼益推誠相結納於是吏治財政軍事悉聽  
林翼主持官文畫諾而已不數年足食足兵東南大局隱然以湖北爲之樞八  
年四月復九江論功加太子少保皖賊陷麻城黃安圍蘄州先後破走之七月  
胡林翼丁母憂官文疏請留林翼治軍改爲署理從之命官文暫行兼署巡撫  
尋以湖廣總督協辦大學士李續賓戰歿三河皖鄂震動官文分兵扼蘄州廣  
濟麻城諸隘固守九江彭澤水師嚴防江而人心始定九年賊竄湖南圍寶慶  
檄荆宜施道李續宜赴援大破之寶慶圍解十二月復太湖被傷叙十一年拜  
文淵閣大學士仍留總督任時大軍圍安慶急陳玉成李秀成先後分兵犯湖  
北境翼擊動局勢遣將迭破之所陷諸郡縣皆復八月克安慶加太子太保是  
年胡林翼病歿嚴樹森代之降捻苗沛霖踞安徽壽州詔疆臣議勦撫之策官  
文疏陳沛霖包藏禍心罪大惡極請伸天討同治元年遣副將周鳳山等勦捻

於河南信陽羅山敗之又破黃梅擒巢收復十餘寨晉文華殿大學士髮捻合  
擾楚豫之交勢甚熾荊州將軍多隆阿方督師赴陝西官文以楚兵不敷分布  
奏調回援九月多隆阿至屢戰皆捷襄河以北賊皆遠遁三年勅巡撫嚴樹森  
把持剛愎黜之六月克復江南曾國藩奏捷推官文列名疏首詔嘉官文徵兵  
籌餉推賢讓能接濟東征不分畛域錫封一等伯爵號果威世襲罔替升入正  
白旗滿洲賜雙眼花翎蓋褒其能與胡林翼和衷卒成大功也四年僧格林沁  
勦捻戰歿於山東詔追諭前年髮捻擾湖北官文不能就地殲除僅驅出境以  
致蔓延益熾下嚴議降三級調用改革職留任視宮銜花翎五年借曾國藩奏  
設長江水師如議行湖北巡撫曾國荃劾官文貪庸驕蹇命尙書蘇森侍郎譚  
廷襄往按坐動用捐款議革職詔念前勞原其尙非貪污欺罔優與保全解總  
督仍留大學士伯爵罰俸十年召還京管理刑部兼正白旗蒙古都統尋出  
署直隸總督七年擒匪張總愚由西路竄擾畿輔下嚴議尋李鴻章左宗棠等  
入援七月擒匪平復宮銜花翎八年回京管理戶部三庫授內大臣十年優

詔賜卹贈太保賜金治喪遣惠郡王奠醑祀賢良祠謚文恭尋以疆臣請合祀湖北胡林翼專祠當官文之在湖北事事聽林翼所爲惟馭下不嚴用財不節林翼憂之聞敬銘方佐治餉一日林翼與言恐誤疆事敬銘曰公誤矣本朝不輕以漢大臣專兵柄今滿漢並用而聲績炳著者多屬漢人此聖明大公剷除畛域之效然湖北居天下要衝朝廷甯肯不以親信大臣臨之夫督撫相勦無論未必勝即勝能保後來者必賢耶且繼者或厲清操勤庶務而不明遠略未必不顧己自是豈甘事事讓人官文心無成見兼隸旗籍每有大事正可借其言以伸所請其失僅在私費奢豪誠於事有濟歲糜十萬金供之未爲失計至一二私人可容容之不可則以事劾去之彼意氣素平必無忤也林翼大悟及林翼歿督撫不相能官文劾嚴樹森去之而曾國荃又劾官文去之官文晚節建樹不能如曩時然林翼非官文之虛己推誠亦無以成大功世故兩賢之孫與恩襲伯爵

文煜字星巖費莫氏滿洲正藍旗人由官學生授太常寺庫使累遷刑部郎中

出爲直隸霸昌道四川按察使咸豐三年遷江甯布政使時江甯已陷賊文煜從琦善江北大營四年琦善歿於揚州所部練勇及江北糧臺事宜命文煜接辦五年春粵匪由瓜洲東竄沙頭港文煜遣勇擊之賊由對岸紮陣爭渡偕水師以大礮合擊賊退瓜洲文煜以沙頭港爲裏下河門戶賊所必爭築土城礮臺疏請添募練勇守禦從之既而賊踞揚州窺裏下河文煜擊之於萬安橋大有斬獲賊勢乃挫七年調江蘇布政使治江南大營糧臺以支給樽節爲軍中所不便提督和春劾其拘泥命來京候另簡用尋授直隸布政使九年英兵犯大沽爲僧格林沁擊退戰後將議撫命文煜從總督恒福赴北塘相機辦理尋擢山東巡撫擒匪圍曹縣分黨擾安陵檄曹州鎮總兵郝上庠合師內外夾擊解曹州圍安陵賊亦退十年擒匪又竄單縣分擾嶧縣得勝廂遣將擊走之英法聯軍踞烟臺文煜遣兵扼利津自駐濰縣韓亭以防陸路北犯尋敵船北駛犯北塘文煜分軍入衛駐通州自率衆赴濟寧勦擒匪十一年署直隸總督尋實授時和議旣成穆宗回鑾轍輔馬賊四起久未淨絕屢詔責文煜搜捕同治

元年坐山東降賊張錫珠等擾畿南督勦不力褫職戍軍臺二年僧格林沁奏調赴營差遣尋授鎮黃旗蒙古副都統三年命赴甘肅慶陽督辦糧臺以病請解職回旗七年起授正藍旗漢軍都統尋出爲福州將軍十年兼署閩浙總督十三年日本兵船窺伺臺灣借總督李鶴年船政大臣疏陳防務光緒三年入覲留京授內大臣鑲白旗漢軍都統左都御史擢刑部尙書七年協辦大學士九年充總管內務府大臣十年拜武英殿大學士以病乞罷尋卒贈太子少保謚文達兩江總督曾國荃等奏文煜咸豐中孤軍捍賊保全裏下河請於揚州建專祠允之子志顏理藩院侍郎

論曰桂良以帝室葭莩與聞軍國數膺讓和之使無所折衝瑞麟從僧格林沁勦賊防夷曾著勞勦文煜亦處兵間無功可錄官文雖無過人之才推賢讓能奠安江漢與曾國藩胡林翼和衷規畫竟完戡定之功茅土同膺旂常並煥豈諸人所可並語哉

柏菴

麟魁

瑞常

全慶

柏菴原名松菴字靜濤巴魯特氏蒙古正藍旗人道光六年進士選庶吉士授編修累遷內閣學士兼正紅旗漢軍副都統十八年出爲盛京工部侍郎調刑部兼管奉天府尹二十年召授刑部侍郎調吏部又調戶部二十三年充諭祭朝鮮正使例有餽贖奏却之二十五年充總管內務府大臣二十六年典江南鄉試疏言徵漕大戶短欠取償小戶劣紳挾制官吏大戶包攬小戶畸輕畸重旗丁需索加增津貼諸弊請嚴禁如議行尋借倉場侍郎陳孚恩盤查山東藩庫劾布政使五篤濫用幕友及地方官縱盜巡撫崇恩以下議譴有差二十六年擢左都御史三十年遷兵部尙書授內大臣尋調吏部管理三庫兼翰林院掌院學士咸豐三年命偕侍郎善燾赴盛京按協領塔芬布輕聽謠言調兵護宅幾至激變得實論遣成將軍奕興坐袒護革任尋以前在鎮白旗蒙古都統

任揀選承襲有誤罷內務府大臣降授左副都御史未幾出爲馬蘭鎮總兵五年擢熱河都統搜捕山匪疏言熱河將惰兵疲州縣不諳吏治行使大錢民皆罷市曠匪占踞山場委員侵蝕商款詔嚴切查辦召授戶部尙書兼正黃旗漢軍都統六年命在軍機大臣上行走兼翰林院掌院學士尋以戶部尙書協辦大學士八年典順天鄉試拜文淵閣大學士柏葑素持正自登樞府與載垣端華肅順等不協會御史孟傳金疏劾本科士論未孚命覆勘試卷應議者五十卷文宗震怒褫柏葑等職命載垣等會鞫得柏葑聽信家人靳祥言取中羅鴻繹情事靳祥斃於獄九年諭上上猶有矜全之意爲肅順等所持乃召見王大臣等諭曰科場爲抡才大典交通舞弊定例甚嚴自來典試諸臣從無敢以身試法者不意柏葑以一品大員辜恩戕法至於如是柏葑身任大臣且係科甲進士出身豈不知科場定例竟以家人干請輒即撤換試卷若使靳祥尙在加以夾訊何難盡情吐露既有成憲可循即不爲己甚就所供各節情雖可原法難寬宥言念及此不禁垂淚柏葑遂伏法十一年穆宗即位肅順等既敗御史



任兆堅疏請昭雪下禮刑兩部詳議議上詔曰柏核聽受囑託罪無可辭惟載垣端華蕭順等因律無僅囑託明文比賄買關節之例擬以斬決由載垣等平日與柏核挾有私讐欲因擅作威福竟以牽連蒙混之詞致罹重辟皇考聖諭有不禁垂淚之語仰見不爲己甚之心今兩宮皇太后政令維新事事務從寬大平允柏核不能謂無罪該御史措詞失當念柏核受恩兩朝內廷行走多年平日勤慎雖已置重典當推皇考法外之仁於是錄其子候選員外郎鍾濂賜四品卿銜以六部郎中遇缺即選鍾濂後官盛京兵部侍郎

麟魁字梅谷索綽羅氏滿洲鑲白旗人道光六年二甲一名進士選庶吉士散館改刑部主事遷中允歷庶子侍講學士詹事通政使左副都御史十七年出爲盛京刑部侍郎十八年召授刑部侍郎兼鑲紅旗漢軍副都統二十年署倉場侍郎命偕侍郎吳其濬赴湖北按事劾總督周天爵酷刑罷之其濬留署總督麟魁復往江西勸開漕京控之獄及江蘇邳州知州賈輝被劾濫用非刑等事並治如律調戶部又調吏部充總管內務府大臣二十二年出署山東巡撫

英兵犯江南疏陳登州突出黃渤三而環海敵兵船礮堅利計難與爭請移兵扼陸路險要尋借侍郎王植赴湖南鞫獄並切湖南江蘇山東水災奏請蠲緩如所請行二十三年擢禮部尙書管理太常寺鴻臚寺河決中牟命借尙書廖鴻荃往督工東西兩壩成而屢墊襪職予七品頂戴仍留工以料缺水增請緩復襪頂戴召還予三等侍衛充葉爾羌參贊大臣調烏里雅蘇臺參贊大臣二十七年召授禮部侍郎調刑部二十八年復授禮部尙書兼翰林院掌院學士以前在山東收受陋規降三級調用予副都統銜充烏什辦事大臣咸豐元年疏陳時事略曰廣西逆匪勞帥糜餉其始不過星星之火當時牧令苟安畏事諱盜不言久之蒂固蔓延養成巨患請飭封疆大吏嚴查地方如有教匪土匪衆衆以及搶劫隨時查拏視緝捕之勤惰以爲勸懲近開捐例實朝廷萬不得已之舉各省清查屢經申令宜飭部臣按時詳覈徵解多寡實行賞罰章程俾生愧奮否則名託清查事仍敷衍國儲不裕官紀益荒甚非朝廷澄清吏治之意奏入下所司議行授察哈爾都統召爲戶部侍郎二年命在軍機大臣上行

走擯工部尙書三年調禮部充總管內務府大臣罷直軍機調刑部八年復調禮部補內大臣十年因謝恩摺失檢降授刑部侍郎是年秋車駕幸熱河命署右翼總兵充巡防大臣英法兵入京師麟魁部勒僚屬戒都人守望相助令家人閉戶厝薪曰事急即燔自宿於巡防廨中相持數月和議成赴行在籲請回鑾爲載垣端華肅順等所阻十一年遷左都御史兼正白旗蒙古都統尋授兵部尙書同治元年協辦大學士時方奉命偕尙書沈兆霖赴甘肅按事至蘭州數日遽卒詔依大學士例賜卹賜其子恩壽舉人謚文端恩壽同治十三年進士官陝西巡撫

瑞常字芝生石爾德特氏蒙古鑲紅旗人杭州駐防道光十二年進士選庶吉士授編修大考二等六遷至少詹事二十四年連擢光祿寺卿內閣學士二十五年遷兵部侍郎兼鑲紅旗漢軍副都統二十九年充冊封朝鮮正使調吏部歷兼左右翼總兵咸豐元年與江南鄉試就勸徐州豐北河決疏陳災情賑務漕務請飭地方官嚴防匪徒竄擾報聞定郡王載銓管步軍統領越次題升主

事瑞常力爭不得尋解左翼總兵職七年擢左都御史八年遷理藩院尙書兼正藍旗漢軍都統署步軍統領調刑部尙書十年寶源局監督張仁政因侵蝕畏罪自盡命瑞常偕尙書沈兆霖按之得前任監督奎麟瑞瑋賊私狀並論大辟追贓後遣戍文宗幸熱河留京辦事督防巡防十一年調工部又調戶部同治元年以吏部尙書協辦大學士皇太后命南書房上書房翰林纂輯史事以昭法戒書成賜名治平寶鑑選擇大臣輪班進講瑞常與焉四年充總管內務府大臣時陝西巡撫劉蓉驟起膺疆寄爲編修蔡壽祺所劾蓉自陳辨疏中引及胡林翼密薦之詞又倚任布政使林壽圖爲人所忌言官遂劾壽圖酒廢事舉劾不公並許蓉漏洩之罪於是命瑞常偕尙書羅惇衍往按之疏白其無罪惟坐壽圖演戲及蓉陳奏失當並予薄譴定陵奉安禮成題神主加太子少保歷工部刑部尙書兼翰林院掌院學士管理戶部三庫六年赴天津驗收漕糧復命盤查北新倉得虧米六萬餘石狀論所司罪如律十年拜文淵閣大學士管理刑部瑞常歷事三朝端謹無過累司文柄時稱耆碩十一年卒贈太保

祀賢良祠謚文端子文暉官至盛京禮部侍郎

全慶字小汀葉赫納喇氏滿洲正白旗人尙書那桐安子道光九年進士選庶吉士授編修累遷侍講大考二等擢侍讀學士歷少詹事詹事大理寺卿以誤班鑄級二十一年予頭等侍衛充古城領隊大臣調喀喇沙爾辦事大臣召還未行會回疆興墾伊犁將軍布彥泰疏留全慶偕林則徐往勘二十五年至葉爾羌疏言和爾罕地膏腴哈拉木扎什水渠可資灌溉又巴爾楚克爲回疆扼要之地道光十二年已奏開墾屯田未種者尙多應先儘安插民戶俾成重鎮詔如所請行先是全慶疏陳喀喇沙爾環城荒地及庫爾勒北山根可墾田萬餘畝命辦事大臣常清籌辦至是復偕則徐詳勘疏言庫爾勒應於此大渠南岸接開中渠引入新墾之地分開支渠二其北山根展寬開都河龍口別開大渠與舊渠並行再分支渠四別開退水渠一又疏言伊拉里克在吐魯番托克遜軍臺西地平土潤土人謂之板土戈壁其西爲沙石戈壁有大小阿拉渾兩水滙爲一河此次引水自西而東鑿成大渠復多開支渠以資灌溉伊拉里克

西南沿山爲蒙古出入之路墾地在滿卡南附近東西兩面以人壽年豐四字分號各設正副戶長一鄉約四擇誠實農民充之承領耕種又吐魯番爲南北樞紐應安置內地民戶戶領地五十畝農田以水利爲首務此次開渠自龍口至黑山頭地勢高低碎石夾沙渠身易淤酌定經久修治章程並如所請行自是回疆南路凡墾田六十餘萬畝回京擢內閣學士兼正紅旗漢軍副都統歷刑部吏部戶部倉場侍郎咸豐四年擢工部尙書兼正紅旗漢軍都統七年調兵部九年命赴天津驗收漕糧時英兵犯大沽僧格林沁擊却之全慶疏陳兵事略謂敵軍戰敗之後不進不退心實叵測竊恐別有舉動未必從此就撫而去我之精銳盡萃大沽旁無應援後無擁護雙港之旅已調前敵津門之備但資土練北塘一帶又頗空虛應請速簡重臣發勁旅嚴近畿海口之備爲僧格林沁之援令廣東義勇擄香港以牽其援兵登州水師合旅順以截其歸路然後國威可振撫局可成疏入被嘉納調吏部尙書十年授內大臣兼翰林院掌院學士十一年充總管內務府大臣同治元年追論大學士柏葑科場之獄原

謙未允全慶坐附和定讞鑄四級降授大理寺卿歷內閣學士工部侍郎左都御史五年授禮部尚書調刑部十一年協辦大學士兼翰林院掌院學士十二年典順天鄉試以中式舉人徐景春試卷疵謬鑄二級去職全慶敷歷清要累掌文衡更閱四朝雖屢黜尋即錄用光緒元年授內閣學士復歷禮部侍郎左都御史刑部尚書協辦大學士五年鄉舉重逢加太子少保六年拜體仁閣大學士七年致仕食全俸八年卒晉贈太子太保祀賢良祠諡文恪

論曰自道光以來科場請託習爲故常寒門才士爲之抑遏柏核立朝正直且所不免其罹大辟也出於肅順等之構陷然自此司文衡者懍懍畏法科場清肅歷三十年至光緒中始漸弛弊竇復滋終未至如前此之甚者實文宗用重典之效足以挽回風氣也麟魁瑞常全慶皆起家文學游陟綸扉其建白猶有可紀焉

清史稿

列傳一百七十七

賈植

周祖培

朱鳳標

單懋謙

賈植字筠堂山東黃縣人父允升乾隆六十年進士由檢討歷官兵部侍郎植道光六年一甲二名進士授編修十二年大考一等擢侍講十六年入直上書房授皇六子諱累擢侍講學士十九年大考翰詹命免試歷少詹事內閣學士二十一年遷工部侍郎調戶部二十七年連擢左都御史禮部尙書調吏部咸豐二年協辦大學士三年疏請山東籌辦團練從之題孝和睿皇后神主禮成加太子太保充上書房總師傅兼管順天府尹四年兼翰林院掌院學士順天府書吏范鶴等與戶部井田科銀庫書吏交結營私以鈔票抵庫銀植察舉其弊讞定讞失察諸官有差植以發覺察議拜體仁閣大學士管理戶部五年兼管工部晉武英殿大學士六年丁母憂命暫開缺給假六月回籍治喪假滿來京植疏言臣兄弟五人諸昆爨故臣幸僅存今不能爲母守制是臣母有子而



如無子臣何以爲子力求終制時御史鄒煥杰亦疏請準其開缺守制詔允之八年服闋以大學士銜補吏部尙書仍充上書房總師傅尋復授體仁閣大學士管理兵部兼翰林院掌院學士十年充京城團防大臣是年秋英法聯軍犯京師車駕幸熱河命楨留守日危坐天安門阻外軍不令入及與會議慷慨不屈十一年復晉武英殿大學士以病請開缺不許穆宗回鑾偕大學士周祖培尙書沈兆霖趙光上疏曰我朝從無皇太后垂簾聽政之典前因御史董元醇條奏特降諭旨甚明臣等復有何異詞惟是權不可下移移則日替禮不可稍渝渝則弊生皇上沖齡踐阼欽奉先帝遺命派怡親王載垣等八人贊襄政務兩月以來用人行政皆經該王大臣擬定諭旨每日明發均用御賞同道堂圖章共見共聞內外咸相欽奉惟臣等詳慎思之似非久遠萬全之策不能謂日後之決無流弊尋繹贊襄之義乃佐助而非主持若事無鉅細皆由該王大臣先行定議是名爲佐助而實則主持日久相沿中外能無疑慮爲今日計正宜皇太后親操出治威權庶臣工有所稟承命令有所咨決不居垂簾之虛名而

收聽政之實效準法前朝憲章近代不難折衷至當伏查漢和熹鄧皇后順烈  
梁章后晉康獻褚皇后遼晉智蕭皇后皆以太后臨朝史冊稱美至如宋之章  
獻劉皇后有今世任姒之稱宣仁高太后有女中堯舜之譽明穆宗皇后神宗  
嫡母上尊號曰仁聖皇太后穆宗貴妃神宗生母上尊號曰慈聖皇太后惟時  
神宗十歲政事皆由兩宮決擇命大臣施行亦未嘗居垂簾之名也我皇上天  
亶聰明不數年即可親政而此數年間外而寇難未平內而洋人偪處何以拯  
時艱何以飭法紀端以固結人心最爲緊要倘大權無所專屬以致人心惶惑  
是則大可憂者請敕下廷臣會議皇太后召見臣工禮節及一切辦事章程或  
仍循向來軍機大臣承旨舊制量爲變通條列請旨酌定以示遵守疏入命廷  
臣集議允行同治元年安徽降賊苗沛霖謀分兵一由清江一渡潁而西聲稱  
赴陝西勝保軍營助勦實有異圖楨上疏言苗沛霖竊而就撫仍復擁兵觀望  
反覆無常所部素無紀律倘長驅入陝何異引狼入室由潁趨豫尙爲道所必  
經繞道清江則去之愈遠意存窺伺西犯山左則北路門戶大開固爲腹心之

患東犯裏下河淮揚通海在在可虞請飭下勝保嚴阻又疏言皖省軍情緊急署撫臣李續宜回籍葬親請勿拘百日定制迅飭回任以固疆圉並嘉納之三年文宗實錄聖訓告成以監修勞賜花翎六年植年七十賜壽恩禮甚渥尋以病乞休不許七年乃允致仕食全俸仍充團練大臣十三年卒詔稱其持躬端謹學問優長依大學士例賜卹晉贈太保入祀賢良祠設文端子致恩官至浙江布政使

周祖培字芝臺河南商城人父鉞嘉慶六年進士歷官鴻臚寺少卿祖培嘉慶二十四年進士選庶吉士授編修五遷至侍講學士道光十七年督陝甘學政歷侍讀學士詹事內閣學士二十三年擢禮部侍郎調工部又調刑部二十六年偕尙書賽尙阿查勘江南江防善後事宜校閱江蘇安徽江西營伍三十年文宗即位疏言我朝立政之要用人之法備載列聖實錄請隨時披閱利害所關今昔同轍容有昔之所利不盡利於今者未有昔之所害不爲害於今者容有昔所欲除之害至今猶未盡除者未有昔所應防之害至今轉可不防者惟

皇上成法在胸以應幾務庶利害瞭如指掌而興廢可決於一心並請責成大吏力戒欺飾考察屬吏其徇隱庇護者經言官彈劾即嚴懲督撫整頓管伍責令捕盜勿任推諉疏入被嘉納特詔飭行咸豐元年擢刑部尚書二年疏言戶部籌餉二十餘條所議之款緩不濟急請照道光二十一年河南河工城工捐輸章程變通辦理又謂按戶派捐先斂怨於民請飭各督撫確查巨富之家勸諭激發忠愛力圖報効從之三年要犯劉秋貴死於獄承審官未得實情祖培坐降三級調用授左副都御史疏言賊匪滋事以來屢諭各省辦團練築寨浚濠仿嘉慶年間堅壁清野之法行無實效賊竄突靡定各州縣毫無豫備賊至卽潰請嚴飭督撫責成賢能有司會紳速辦有怠玩從事反滋擾累者予參處從之歷工部吏部侍郎四年連擢左都御史兵部尚書兼管順天府尹六年宣宗實錄聖訓成加太子太保調吏部八年會辦五城團防以吏部尚書協辦大學士兼署戶部九年調戶部兼署吏部京師戒嚴疏陳團防章程六條曰查戶口以別良莠勸保衛以聯衆志任官紳以專責成協營汛以聯臂指設水會以

備不虞增幫辦以資助理車駕幸熱河命留京辦事拜體仁閣大學士管理戶部十一年文宗崩命總理喪儀兼辦定陵平安峪工程及穆宗奉兩宮回鑾祖培疏言怡親王載垣等擬定祺祥年號意義重複請更正詔嘉其關心典禮又言近畿各處抗糧拒捕成風由於州縣不得其人諭各督撫秉公遴選毋稍徇隱同治元年調管刑部四年山陵告成賜花翎五年文宗實錄聖訓成賜其子文俞員外郎文令舉人六年卒年七十五優卹設文勤

朱鳳標字桐軒浙江蕭山人道光十二年一甲二名進士授編修十九年大考二等賜文綺直上書房尋督湖北學政歷司業侍講庶子侍講學士侍讀學士二十五年授皇七子讀連擢內閣學士兵部侍郎調戶部二十八年命赴天津驗收漕糧尋偕大學士耆英查辦山東鹽務疏勅歷任巡撫運司收受程儀節壽論譴有差又言山東鹽政疲敝甚於他省若求裕課暢銷惟除弊緝私最爲先務會議變通成法請先課後鹽以重帑項下部議行又查運庫出借銀七萬餘兩責賠繳藩庫積存減平及扣還軍需行裝等款三十萬兩撥解部庫通省

倉庫正雜未完銀四十一萬兩缺穀三十七萬石命限八個月彌補咸豐元年  
擢左都御史歷署工部刑部戶部尚書三年粵匪陷江甯復陷揚州漕督楊殿  
邦退保淮安廷議調山西陝西兵七千赴援鳳標與尚書文慶侍郎全慶王慶  
雲合疏言淮安賊所必爭萬一賊衆渡河則河南山東民情震動撲滅愈難請  
命山東巡撫李德親往淮安扼賊北竄並請敕直隸總督迅派布政使張集馨  
率兵扼要駐守以爲京師屏蔽疏入如所請行五月賊陷河南歸德鳳標與大  
學士賈楨尚書翁心存等條擬防勦六事多被采擇未幾悍賊林鳳祥等竄畿  
輔復借楨心存等奏陳預籌守城事宜疏入報聞四年授刑部尚書六年宣宗  
實錄聖訓告成加太子少保尋調兵部復調戶部八年典順天鄉試因中式舉  
人平齡硃墨不符爲言官論劾興大獄大學士柏葰論大辟鳳標亦解任聽勸  
文宗原其無私從寬坐失察革職逾數月命以翰林院侍講學士銜仍直上書  
房授醇郡王讀如故歷大理寺少卿通政使左副都御史署刑部侍郎隨扈熱  
河復擢兵部尚書十一年獲送文宗梓宮回京追錄扈從勞加二級調吏部充

上書房總師傅同治七年以吏部尚書協辦大學士兼翰林院掌院學士未幾拜體仁閣大學士管理吏部十一年以病乞休命以大學士致仕食全俸十二年卒於家贈太子太保諡文端子其煊工部郎中官至山東布政使

單懋謙字地山湖北襄陽人道光十二年進士選庶吉士授編修十七年入直南書房十九年大考二等以贊善升用尋授司業遷洗馬二十年督廣東學政懋侍讀庶子以病歸父喪服闋請終母養咸豐二年粵匪擾湖北懋謙方居母憂命在籍治團練六年回京仍直南書房補原官七年督江西學政懋侍讀學士少詹事內閣學士工部侍郎均留學政任十一年巡撫毓科布政使慶廉爲言官論劾命懋謙按之疏言毓科非應變之才適當賊擾省防尤重本境兵勇不敷調遣辦理未能悉合機宜見雖全境肅清善後急宜妥辦籌備浙防接濟皖饑大局攸關恐未能措理裕如慶廉見未到任無事蹟可考未敢妄陳疏入報聞任滿回京充寶錄館副總裁同治二年調吏部擢左都御史三年偕大學士瑞常等進講治平寶鑑授工部尚書四年命赴盛京偕侍郎志和等承修太

廟昭陵工程時奉天馬賊猖獗命懋謙就近查察劾將軍玉明府尹德椿下部議處回京疏陳馬賊難防請籌兵饟出邊會勦以弭盜源又請飭奉天所屬各州縣查勘市鎮鄉村應修堡寨之處勸民作速興築擇錄嘉慶年間魏景瀚所著堅壁清野議刊發各州縣令遵照團練守禦之法量爲辦理疏入均得旨議行六年管戶部三庫事務七年調吏部十年管國子監事務十一年以吏部尙書協辦大學士尋拜文淵閣大學士兼管兵部十三年因久病請解職回籍允之光緒五年卒於家詔依例賜卹有學問優長持躬端謹之褒贈太子太保諡文恪

論曰自咸豐初軍事起四郊多壘廟堂旰食京師舉辦國防閣部重臣領之賈植周祖培朱鳳標皆預其事其時用人猶循舊格揆席多由資進至穆宗踐阼底定東南漢閣臣多取勳望六官中大拜者尠惟單懋謙獨由正卿入閣時以爲榮遇焉